

天真閣集

天真閣集卷五十二

駢體文二

昭文 孫原湘 子瀟

啓

徐孝子孝行徵詩啓

夫火惟土事成養而弗名文以綸終引緒而莫解自昔篤行不
斲咸知而雖涌十鍾天與七年之賜門樹六闕國彰三世之旌
俾戶詠履霜斯家敦愛日故左盲削牘先歌潁谷之風疎哲肆
笙首補南陔之什孝子徐氏名金霖號漱坡長洲縣增貢生棘
薪抱懷樂木在性推轅養志不耽毛櫟之歡闔牖傭書深以溫
裾爲戒固已行孚犬乳邨改烏傷族無間言庭有降瑞旣遭父
明經君之喪霍助鳴哀雞同骨立居廬有法惟遵涑水之儀讀
禮無違悉屏祇陀之教太夫人嚴氏以悼喪所天遽櫻沉痾手

調湯液饑不知餐躬滌厠踰宵無弛帶髮媿膝下親爲雛鳥之
娛宛轉泥中代緩螭螭之怒蚊嚙膚而卻扇水墮指以求魚卒
致東海迴波竹延枯節西山駐景草戀餘暉葢疾旣革矣復甦
者旬日哭殷瑤極天彰溟海之誠事類金滕神許血書之顯此
尤靈武二孝遜厥精虔關中一龍無斯誠感者已至若棠花均
茂荆樹齊榮麾卜式之羊代償驢券移儒庭之雛通入鳥巢徐
卿二雛爲季江立後姜氏一被與仲海同眠引領寄大雷之書
療鬚進防風之粥化燃萁而輟泣諷斗粟於母謠凡厥植心悉
根至性配邱孺人早卒終身不再娶單鸞舞鏡謝非吉甫之賢
獨雁呼雲悲甚德宮之戚屏琴心於在御防意如城卻睂語於
登墻持身似玉虧體之戒無謂乎鄢人孝門之銘奚慙於柳子
夫射父所過草木盡香青女一飛鐘簾悉應觀豺獭之祭而古

禮可求聆豹駒之音而新聲斯振矧夫道稟先王德符靈哲高
矣美矣衣與繆與匪徵淹雅之辭曷備輶軒之錄綸綍五色
旣煥旌門蓼莪三章尤善導俗所冀松間柏悅瑟應琴和抽
彤管而揚芳嗣白華而製詠俾牛徽古烈被之雅絃猗予前休
播諸樂石庶幾太湖三萬六千頃化成孝感之泉莫殫七十有
二峯長徧卷施之草

徵刻詒經堂續經解啓

通志堂之刻集學海之大成爲經庫之總匯收撫津逮厥功鉅
矣顧天口聖譯代啓新機戲繇姬經不絕家法蘭臺秘寫綈裘
珍儲藝林莫窺流播終闕張君月霄獵楹壁之遺鳩箱軫之積
施架排次鉤心校讐得人間希有之本七十五種爲卷乙千四
百有奇古人之菁英聚焉微學之津梁繫矣不以詒癡許窺秘

奧其中如仁山尚書注定許爲鹵訓卞爲禮季友蔡傳音釋繫
艱於播釋要作拘皆能自出新意不囿陳說至如信安詩說以
卷耳爲太妣傷妾里之難以蕤葭爲秦襄卑洛邑之遷以正月
爲國人憂篡攜之亂以綢繆爲曲沃兆分晉之機尤能目炬千
秋心杼獨斷間有穿鑿可備參稽若夫楊氏春秋穀梁疏零璣
斷璧久與賈氏儀禮疏並爲世所珎貴張洽春秋集傳王元杰
春秋讞義謹案

欽定四庫全書總目一稱遺佚已久一稱脫補無從今俱抄自
原鏤燦如完璧洵可稱墨莊之秘笈策府之殊珍已惟睎袂旣
繁剗剗甚鉅月霄志公同好力絀獨擎將永汗竹之傳必藉布
金之助昆吾之鏐晨集語兒之木父刊用告儒林漸襄盛舉上
佐

聖朝之崇學下踵東海之傳經庶幾祕發嫺嬛六際咸游乎淵海道垂靈籙百家盡獻其奎琛

引

募修兩邑城垣引

重門設險周官嚴掌固之修營室程功月令戒孟冬之事是以嶮峭繩直西都鬱其金墉嶙峋雉排北使偉其銀鑄莒人恃陋終貽君子之譏仲幾不供莫掩大夫之罪吾邑城垣自雍正戊申昭文勞公修其東北逮乾隆癸未常熟敬公葺其西南迄今六十餘祀矣涉歷星霜漂搖風雨女牆剝倒粉堞傾危睥睨頽邊但有驚鳥之集麗譙缺處幾成窟鼠之途雖斥堠消烽無虞外寇而濱江控海誰障中吳宜未雨而綢繆及清風而修葺不可緩也其能久乎夫起徒均力者有司之賢增埤浚隍者往役

之義爰仿鑿號之意以代鼙鼓之徵誼共切於州閭事何分夫
畛域在國在野總屬郊圻封守之中實鑿實墉豈容芻絲麻
之棄功須萬計壘土可以爲山夫起千家衆擎不難舉鼎雖肥
磽巽轍自有上地中地下地之分而彼此同舟應無貴者賢者
老者之舍惟期赴義若渴樂輸如雲築早聽夫登登墉復還其
仡仡城郭溝池以爲固所期義出同人篤實輝光而日新行見
筮之大畜

序

邵古太守行看子序

夫清規懋賞與白雲俱潔抗志高蹈以黃松爲心襴衫小馬之
計入市何嫌臺池引賓之娛無田足樂顧烟霞可期日月不借
峯指丘老而譏悔少年亭名三休而病迫餘歲建勲有言自知

非壽考欲求數年閑適詎可得乎古音先生近伏生授經之年
高薛萃懸輿之志片石不載一屨未營角巾倏然商樂鏗爾觀
察李公飭厲雅化傾心文儒以禮聘主游文書院敦請至再乃
勉就席鄭虔家具橐青氊而來威輦妻孥就白社而處地故名
石梅梁昭明讀書臺在焉擅香雪林巒之勝具煙雲竹樹之美
清嘯則明月鑒帷高枕則丹霞入牖龍門著書之暇清娛侍旁
鄭鄉治經之餘小同應側時或據石聽雪鈎簾看山牧馬在郊
愛其神駿啼鶯坐柳藉以鍼砭葢柴桑之松菊並此堅貞中條
之猿鳥同其暢適也已某與先生爲中表兄弟而年齒懸絕士
龍鬚鬢便識閔鴻沈約晚年乃交何遜撫塵旣洽出所繪行看
子屬爲題識循覽感歎不能已已先生以名進士握符劇邑把
麾雄郡歷仕滇南晚調西粵蠻花犵鳥之鄉簪雨嵐煙之路渡

八筐之水則魚龍交飛越鷗咋之山則鴻鴈駭墮方其星軺課俗露冕行春傳檄武侯之臺題名伏波之柱寧復計喬臯返溯忼霍歸攜嘯傲尊鄉婆娑粉社有如今日者哉是以遺榮止足者必期乎喬松之年守福無虧者先務乎虛靜之養有白鬚之樂天而後香山入畫有耆英之彥國而後妙覺繪圖方先生家居時嘉姻勝侶至今羽化殆盡而先生以華顛一老間諧三朝銅狄摩挲不知年歲幔亭樂飲半是孫曾不亦可掀髯自褭邈世無悶矣乎按圖無款識無歲月未必作於此時而花木參差人物點綴與今所處若合符節季真歸來非有鑑湖之乞摩詰眷屬先入輞川之圖君在畫中讀畫幾忘一角家山我從題外尋題如爲二疎寫照

江城侍膳圖序

陳小雲秀才示余江城侍膳之圖而告曰某遭逢重慶隨宦三
吳湖尊可舉咳蘭足養凜白華於晨露心不遑留撫翠巾於春
暉日彌可愛圖因此作子序其由夫紅旌啓路碧油建幢材官
趨前妖冶侍後將牛渚之命絕裾便行省雁門之親信宿卽去
喜盈捧檄徒瞻嶺上之雲悲感鳴騶空憶溝中之水前史已事
畧可鑒已就使膳兼二部娛備三珪將吏羅迎公卿上壽而笨
車屏道反樂蕭閒鼓角行田維娛衰老容臺簫管不如勸猷子
之餐也御座葡萄不如懷陸郎之橘也惟是三觚堪冷八襪袞
單茅屋半間韭花二月叔褒賣簞究缺甘鮮江革推轅終搖筋
骨未免參乎歉志由也傷貧而况偕老重闈同堂四世天之所
靳數豈能齊小同在掌之文先凋乾蔭伯繇捧手之硯未識翁
顏拜壁上之畫圖撫省中之磐石愍孫誰恤述祖空歌孰是代

有佳兒環侍藉梧之笑天貽耆壽親看嘉樹之榮者哉秀才以
名父之子有乃祖之風味道舍腴處華抱素尊甫雲伯大令旣
申祿養之志秀才敬承佐餽之歡如火樂木大令之愉愉也視
土事火秀才之扶扶也兼以廡下鴻妻能爲椒頌膝前驥子早
就蘭筋落花開而砌紅江筍茁而園綠水木明秀足娛覩聞禽
鹿擾馴咸識融洩斯圖也其以負米身閑懷冰賦暇而託深情
於豪素寓至愛於鉛黃者乎以彼看花悵日對草忘年息捕鯉
之勤忽弄雛之樂而徒情移解帶癢拂連環者觀此可以興矣
他日登公瑾之堂捧太邱之杖蟠松設幄癭檉作興鶯花一庭
珠玉四座元方授几季方將車慈明行酒文若著膝爲君振袂
而歌曰覆船魏兮珊枝蠲金輝麗兮瑤波流子能致之解百憂
衣與繆與其何求

吳進之采蘭圖序

夫服勞奉養者孝子之分致命遂志者達人之節觀夫躍鯉寒
氷涌泉竭澤披裘炎夏抱甕漢陰碩德清風異代同揆郡邑上
奏于彤廷遷董類書于青冊誠欲勵末俗激頽風豈必勲峻太
常名垂彝器揚庶人之行極諸侯無以加表匹夫之志雖三軍
不可奪庸非先王之所垂教君子之所樂稱者與進之先生系
出世胄性耽高尚寄情鴻隱絕意冲飛慕仲長統之卜居清曠
以樂妻孥效陶泉明之結廬窮僻以謝車馬爰有先業在九峯
三泖之間據茂林脩竹之勝于是定子舍開北堂奉慈顏樂壽
康秋蔬足以給膳春稅足以代耕問其所好則四腮之鱸進時
其輕煥則三梭之布具何止虞潭養堂之榮無復周磐汝墳之
歎融融洩洩樂在其中猶復閒居之暇馳情翰墨假彼絹素寫

茲風神義有取乎循咳情彌暢於陟屺名曰采蘭圖以見志焉
昔者崔邠導輿猶資祿養潘岳作賦終慚解職織屨於陵寔虧
溫清質春廡下祇慕倡隨以今視昔殆復過之且自俗尙梯榮
人希宦達以安貧爲不德以祿養爲尊親微論嚴媼迴轍溫母
絕裾識富貴之不祥歎乾沒之致禍良可慨已卽有八座奉其
起居五鼎隆其牲膳而皇華駱驟望白雲者伊誰苞杞離翔乞
烏哺於何日是以毛義之檄不如季路之米也陶侃之鮓不如
茅容之雞也夫易得者一品之服難致者三春之暉皋魚泣風
令伯變日曰磬拜甘泉之像百年卻思遠之被亦已晚矣觀斯
圖者可以興乎于是宗黨慕義士林嚮風抒寫篇章形容潔白
不揣庸虛忝爲序引糠粃在前匪自托于卜氏笙詩可補還有
待夫廣微

趙孟淵秀才遺集序

趙子叔才稟其哲兄孟淵所爲詩一卷將付諸梓屬爲之序夫
鑿彌之木遭折而猶育青嬰之珠未圓而有耀不能濯扶桑之
赤枝養明月之素彩凶鳥遽下吉光僅遺可慨也已猶憶花濃
雪聚雁早鶯初每過北山輒扣茅屋嵐雲四壁拂琴自鳴水竹
一房映字皆綠尊甫含泉翁出其宿醞佐以時蔬命子行觴爲
賓投轄浣花驥子不墜詩名睂山小坡時有佳語甌北先生爲
君家之宗衮主海內之騷壇君親承指授益變風格倚樓之吟
名句可摘非熊之集一卷足存又多乎哉善斯可矣叔才懷春
草之昔癡憫荆花之早萎淚與風飛臺隨雪竄南昌四洪龜父
附弟而傳雞肋一編謙之輯兄之作後之覽是集者可以生孝
弟之心增孔懷之重又微獨詩之可永也

程南邨清心園題詞小序

南邨主人遺千時之榮耽高隱之癖埽元亮之徑闢蘭成之園
疊石作峯飛雲盡縹疏泉爲沼蟄月皆圓烘染丹青多費柿葉
之紙唱酬元白時抄桐花之篇昔倪迂清閨占雲林之幽仲瑛
草堂據玉山之勝以今方古何多遜焉丁卯九秋扣辟疆之扉
看子猷之竹橫槎貫月鑿洞穿天如蟻穿珠若蛇行壑曲折之
致恍目駭心緬彼崇情愜余勝賞主人於是出金粟之編索鐵
崖之序循覽羣製率題弁言寔有託乎雅懷匪直慕夫佳作小
山隱就他年續剡曲之遊曲水詩成此日愧瑯耶之作

鉤寒雅集詞序

吾邑自竹橋儀曹主長湖田喁于樂府而後家脩簫譜戶撥箏
絃先生之族子瘦青尤能力抗前塵別標新旨往往循蹊獨走

窮求窮渺之琴踏葉孤尋刻寫荒寒之畫會予考槃多暇得生
吟屐相從寄情樵谷之歌託興漁家之笛時值殘冬景仄穰歲
風清小市魚肥深缸酒熟瘦青招寒鷗之侶開煖室之筵新聲
競流高醺迭主猛燭忘夜緩爐自春敲冰而玉筋雙盤灑雪則
梨花一硯相與裹渾脫之帽擁蒙茸之裘避席撚髭泥鬢呵凍
天雞號而猶唱月兔落而忘疲一字初安窗外之孤梅欲笑九
宮旣叶籬頭之悲築皆鳴良會易終古歡未已昔人云相和若
琴聊以寄心者其斯之謂歟或以曉風殘月技陋雕蟲寵柳驕
花音乖大雅有慙真率何當文章不知蘭抽弱幹自足殊芬桐
挺孤枝便饒仙韵與其摹天繪日徒務好龍之名何如縫月裁
雲獨擅射雕之手且大晟宜究匪徒按譜填腔抑小道可觀尤
貴知人論世宮商高下半黍難移子母陰陽四聲必合白石之

借梅弔古環珮覓歸碧山之託月傷今山河影缺苟非律求精
審旨寄遙深其能并水皆歌人沾膏馥野雲無迹世奉瓣香也
哉而况鳬鷺閒盟雞豚近局遣心燈畔送日花間大白浮來小
紅唱起檀板敲而紙醉銅琶按而玉頰謠自比於轅童歌適儕
夫壤叟不求人解聊樂我員而已時歷三月會惟九人凡一十
七調計六十八闕其中工拙不具論云

平原諸子銷寒集序

草端肅月野磬人間緹籥勁序泉香酒熟軒轅道士戲呵石鼎
之囊開元詞人賭畫旗亭之壁此平原諸子消寒之所由集也
時則嚴雪覆庭深雪礙徑簾垂卻凍之骨爐熱減衣之膏徵絃
初扣場花早胎羯鼓不鳴冰筋自落於是俠嘉夜羅英賓蘭芬
屈卮蕙馥彫俎猛燭燒而忘曉偏提行而偏春相與擁丁零之

裘著渾脫之帽鉤心鬥險織網摘華寶帶花生一縣之梅欲放
金城絮煥雙湖之柳疑香歌仿八能圖歷九辯觴浮椒而春入
編束筍而景新幾於人握驪淵之珠家分縣圃之玉矣夫暝盒
金逃甜羹玉沸肥妾如陳娛童列圍室則春矣而所述華淫祇
以厲我冰敲太白之頂香炷寶雲之谿腰笛吹而崔來角琰繫
而月墮致則高矣而不有佳作何由雅懷茲則佳墨在御義樽
應時數比香山而人皆年少事同佳得而客盡能詩辱以識途
屬爲別擇錄存如干首裒而序之較月泉之吟社敢誇臬羽之
評視漢上之題襟竊比成式之序

海虞賦鈔序

今將泐丹丹盤盤之鄉剖蠨蛸之胎擷嬰垣之華重鎚鴉忽堂
夜黎難頓牟螭螭珂玳雖貝殊形詭狀充臚壓舳竭天地之精

英而不足爲異也。朶山角海淵旋陀盤，搜蝦瀨於沙中，相寶苗
于樹底，舉網而獲，麾班而還。而江歷徑寸，元真度尺，佩諸衣帶，
則明月滿堂，叩以金鋌，則清聲殷壁，斯足以奪陸賈之裝，駭商
胡之目矣。海虞下邑也，環海爲境，而乏瀕，寧溱濬之，厖負山爲
城，而鮮巖嶷岩嶺之險，地秀而土卑，氣清而質薄，故自羸鑄以
降，齊梁以前，聞人不彰，著作罕觀，顧欲極荀宋賈馬之奇，觀追
班楊鄒枚之餘，烈不其難哉？若夫游魚非淺沼所能窮，而淺沼
有遊魚之樂，嘉卉非芳園所得盡，而芳園有嘉卉之奇，蓋材無
無地而不生，風闕時而不丕，變要在挈瓶者就海求波，操斧者因
山度木而已。吾邑人文自宋始，著公異大雅之作，欽道處一之
篇，時代旣湮，著錄未顯，明桑思元兩京賦，顧仲恭後蝨賦，淹雅
宏麗，上薄漢魏，而蒐采旣隘，掛漏恐多。今之所撰，槩從畧焉。惟

是

皇朝文化滲漉解壩戶襲風鈞家摹禮智述邑居則敷奏承明
之庭擬畋游則拜獻鉤陳之次下逮托興風雲紀懷魚鳥靡不
御蘭芬于芳序繡輦悅于華年譬諸越吟楚些土音而氣備乎
八風粵鑄秦廬方物而功通乎九野雖偏隅之風畧可觀矣王
君蕤齋與胡君吉山景君闔仙及不佞端居多暇陋巷餘閑博
采零璣窮羅碎錦取諸先哲之集附以時賢所爲自孫扶桑殿
撰以下得七十四人賦乙百四十九首都爲四卷名曰海虞賦
鈔登壑山而睥睨涉濞水而神疲沙汰旣清華華益挺所以擷
芳仙苑惟求積石之珍拾翠神洲徒取吉光之片匪獨颺腸之
易滿抑亦鼠腊之都捐倒海傾崑俟諸來者

虞山試律鈔序

王君蓺齋既偕同人輯海虞賦鈔以次及試律詩

皇朝以來作者二百七十二人詩五百五十六首不錄佗體專爲帖括計也官韻率以八間收六韻童子科以此試也別鈔七言排律一卷爲館閣地也四韻亦稱律胡以不鈔非試體也律以統氣類易故訓分以其定分止爭故訓法以其萬法所出故訓常以其係累人心故訓累國家以排律試士所以示人常軌束縛之使不敢犯降其心靖其氣而后其聲和矣以蒲稍之逸足使之倚輶輓則凡馬不遜以韓杜之鬼力使之鬥沈宋則拙行立見故作此體者若大將之執旗鼓極五花八門之變而進退疾徐疏數不違矩也若老吏之持網捕極五聽八議之繁而虛實輕重淺深不差黍也茲之所錄和而不韻新而不靡衆響繁會而布指度寸不失尺咫雖解角土風足以鼓吹休明導揚

盛美已

呂慎齋學博八十壽

今將演熊經鳥伸之術餌鳳芝麟北之方長養雪芽配合嬰姪始得接跼客耳希蹤火低此強振之寂郵非自然之徵應已蓋必有醇固敦龐之氣而後集介純真撫之休有清靜貞正之娛而後備綰綽延洪之景我慎齋先生者斯其人矣先生一代清才三生哲匠探陸廚之典通伏壁之經文陣雄師置曹劉於眼角長河東注以屈宋爲衙官徒以協律工文舜民援衍甘居吏隱樂就經師授易書詩者千人歷郡州邑者五就風清馬帳爲學者之楷模望重龜山視諸生如子弟然而華陰矮屋不因閒曹而廢公安石東山能以蒼生爲己任在滁州學正日委勘災者一委查饑者再嚴霜被體猶歷威夷朔雪侵塗不辭皸瘵卒

使鳩民島藻。壯遇失威。繪監門之圖。而千邨得活。上人旱之解。而萬竈生煙。方知仁不需位。尊不在秩。呼三輔大人。不道蘇純。儒士號杜陵男子。誰知蕭育。卑官苜蓿。一盤稻脂。四野雖芻。芻之思未竟。而槃槃之才。畧申已既。除廬江教諭。以憂去官。遂絕意仕進。清規懋賞。以止水爲心。高蹈遺榮。與白雲俱潔。謝家封羯。聯吟春草之池。陸氏機雲。雙笑棠花之下。取圍棋而睹墅。疊奇石以成倉入室。則五千餘卷。俱通開門。則三十六峯。可數衣上之煙霞。一襲杖頭之雲水。雙清有逍遙。遂初之風。極跌宕。宕文史之致。及來安教諭之檄下。而先生年已七十矣。以爲子輿三。盆樂其逮親毛義。一官心乎祿養。豈有身經脫繡。重辭鱸膾之鄉年。已懸車再赴。宦書之召。封軺晨至。讓表夕陳。此非宏景陶元子真養素其能若是之黃鵠高舉孤雲自飛也哉。或者謂披

裴鈞澤客星可招安車蒲輪枚生終至捨鐘阿之紫蓼膺效穀
之元纁翹藥王風軒轅帝載焉知不書玳公之竹帛刻璜水之
玉符不思閣上麒麟何如山中之猿鳥也戟門鼓吹何如幽壑
之風泉也先生風高萬石亭築三休松石爲朋山池作宅黃花
徑僻可畱真率之賓綠墅尊香便作薈英之會薊子訓不知其
年歲華元化人以爲少年以視足韡孑孑手板龍鍾夕治官書
晨趨公府者其得失何如也今年春訪先生東山別墅入華陽
之館松竹如仙游廣漢之園禽魚皆壽謝家蘭草露蕊承歡王
氏竹林風枝挺秀先生斟彭鏗之雉作羹飫之書韓軌畱賓宵
分不止陳遵投轄醉止無休此尤足徵摩狄之精神杖鳩之翼
鑠者已賢孫文博以先生八十攬揆之辰徵文爲壽紫芝瑞茁
爭歌綺里之詩玉稻香清齊進中山之酒家近琴高水碧仙鯉

爲葵屋鄰蔬粟山高綏桃自熟午橋展宴正賢人應聚之期亥
字添壽值

聖壽臚歡之歲公如春氣開顏看百歲齊眉我掛秋帆回首望
一星躔角

王雪河七十壽序

嘗瀏覽前牒博稽懿規見夫延介糜之慶極相羊之虞者類皆
孝友培其本根任卹廓其求應川觀巖處鬯觴詠之懷元蹟梵
塵契昭曠之旨樂荃蕙之彙征匹諸蔗以甘節然而逢吉者有
繇得全者良尠若夫惇八行之景鑠綽五福之阜康弓裘載傳
鮒蓄未艾其惟雪河先生乎先生烏衣清門馬蕃令胄自爲童
子時嶄然已見頭角豐歲瑾瑜寒年繼續識者器之文園善疾
遂輕官爵賡士衡之世德敷安仁之家風其後於荆溪公也嫡

兄遠宦二室之權一人承之絜南陔之華情殷河獺洒防山之
涕覓斷泉魚就養無方誠感行路至於樹萱堂上黃髮怡然讓
棗室中白首無間繄積善之有慶洵太和之致祥追配古賢撫
範末俗先生之孝友也且夫盤錯不匱者智士之上材忼慨喜
施者達人之高致先生千金脫屣片言解紛焚積年之券囊底
無錢延滿座之賓樽中有酒大裘徧覆回窮乏之歡顏初地重
開繪莊嚴之珽相凡諸檀施弗恡解推是以游龍流水望劇孟
而如歸雀甬嶺牙得文通而自息上自當事遠逮殊方靡不奉
以南車欽爲北斗所謂稱物平施而千里應之者不其然乎先
生之任卹也抑聞之浸漬名教不廢嘯歌陶冶性靈必資邱壑
六合之瓜步山水最佳處先生家焉挹娥睂之秀彩嵐翠可餐
攀桃葉之崇峯江流在望固足以啓思古之情愜探奇之志矣

於是調素琴攜芳榼響泉再鼓相賞松石之間藜杖偶扶自得
羲皇之上以優游之歲月寫金玉之德音宜其翔鳳擢才騰蛟
布譽已又况香山禪悟超蘭闥之四城淨土薰修證蓮臺之九
品黃花紫竹示極樂因山色谿聲卽壽者相鬯開士之素襲契
眞常之妙旨奚事引伸獮禽服餌芝朮者哉夫其制行也如彼
其頤性也如此重以倫紀之樂自古斯難履戩之庥於公爲盛
雖簪花已謝茂漪而佐筵寔偕絡秀螽斯美瑞家分三鳳之行
鵲起英聲人有六龍之目穆家羣玉遞進蘭饒竇氏聯珠行登
桂苑擊鮮可茹分甘是娛乃詒謀已逮孫曾恆言不稱耆耄循
鴈行之序尙有伯兄竭烏哺之忱依然孺子假年惟永陋二首
之計旬愛日方遲卜九齡之屢錫是則蓬瀛之求無勞涉海期
頤之兆信之樂山已某獲交謚紀飫糗太邱之風遐企佺期輒

效吉甫之頌麗星輝於南極游戲地行栽寶樹於西池皈依無量謹以壽人之九章爲先生誦之

林母吳太夫人七十壽序

蓋聞松栢之承也翠蕤鬱倪虬幹敷榮可以蔭衡喝芘馴雛乃根節之勁固而飛節之芝毓焉衡嶽之峻也衍脈聯轄列陬連纒可以藹谷蔘摛巖繡乃岡陵之安貞而文虎之珣韞焉矧夫易春煦和必先資於愛日澍霖渥潤尤待覆以慈雲有劉夫人之著訓而練縕之教政成五原有湛太君之封鮒而運鸞之勲勲茂晉室古誠有是今復見之林母吳太夫人毓粹延陵播芳構李早茂徽華夙彰榮耀修詩書而賁道稽圖籍以照言柔嘉有文朗慧善鑒締良嫻於哲士配嘉耦以閑家稟圭璋則樂歌雜佩受蘭茝則虔賦采蘋夫其善心爲窮美言爲宛經訓之緒

言敦懃以固勸勉以貞子家之微旨以宜吉以福多兆貞乎焦
易謂寬和謂持久箴奉乎班書故其相夫子也安於儉而習杼
機有薄笨之乘其訓諸子也從所好而陳俎豆有矩步之容是
以幼卑謹爾時借溫顏中外秩然從無遽色宜乎頭龍季虎並
著美於蘭芬鳳舉鴻鸞蚤騰聲於桂苑玉潤則歐王偕貴華穠
亦邢譚分輝福固膺 紫誥之榮德莫罄青鏤之述矣長君桂
舟明府賈逵說經久擅無雙之譽和凝傳鉢獨高第五之名綰
綬江南分符吳下築養堂以種樹御板輿以迎親而太夫人自
航家園不樂官舍親戚情誥孫曾滿前遠眺湖山得黃鸝鸚鵡
之勝近周林汜有紫房赭鯉之奇此尤高識遺榮慈徽邁俗者
已今歲六月明府公來治吾邑下車伊始善政畢張款襟旣深
懿行斯悉鄭善果之聽獄必稟慈箴張遂清之訓廉尤尊母教

茲於十月下旬之吉爲太夫人遙稱七袞之觴大年之兆久頌
乎慈仁餘慶之徵斷推於聖善豫飭烹鮮之政勤卹民衷遙傳
剖鯉之書無須官物於是明府公仰體慈隱悉辭賓獻一篇魯
頌但徵壽母之歌三尺吳綾自製尹何之錦原湘托公瑾之醇
交未獲升堂而拜揚義成之至行先爲拭琬而鐫分來仁核卽
獻冰桃酌取廉泉便成甘醴遙想晴川掛綵紫鸞揚九節之簫
定知經幔開筵黃雀資十華之券謹序

邵母馬太孺人六十壽序

邵子蘭風謀所以娛其親者以壬申十一月朔爲母馬孺人誕
降之辰賓客拜於其家蘭風具春酒烹羔羊止衆賓而觴之曰
某貧賤不能捧毛義之檄御雀邠之輿羞恭武之鮓築虞潭之
堂足以開慈顏益壽康願得諸君子之一言以爲母壽言未旣

有酌而祝者曰噬鯪捕鯉束皙之所以補詩也宴林禕汜安仁之所爲作賦也方今清冬如春日麗霜皦丹楓參差靈果匝繞借鎬峯以爲園環隱湖以爲沼駕輕舠之夷猶覽崇林之窈窕亦足以宣勞節和慈抱矣乎孺人曰非予志之所樂也又有酌而祝者曰寒山之桐慈母之竹鳳凰巢其顛雷雨鳴其腹斲爲琴簫飾以珠玉使修容爲淶水之歌屈庭奏元靈之曲輕儻浮波而出聽寒鳥驚枝而起宿於是張廣幕列重茵壽觴旣舉仙樂載陳神融志暢怡然天真孺人曰非予志之所樂也客有洗觶而前者曰二客所陳華則華矣於克昌厥後之義無聞焉蘭風昆季負跣跣之才隱而未遇一旦待詔金馬之門奏長楊羽獵之賦天子爲之動容公卿爲之傾慕蟬冠貂冕列拜於張酺之庭麟趾襲蹠充積於顧雍之庫又奚啻章服進九樹之

釵潔養供三牲之具乎孺人曰榮名不可以倖邀富貴不可以
强致所樂不在是也又有洗觶而前者曰衣錦繡者懼夜行樂
鼓鐘者嗟曰眎今將割崑崙之禾採女胡之實搗之以蟾杵丸
之以鸞密蘭脩授靈飛之符青要示長生之術使華髮墮霜眊
視審曰撫九世以婆娑樂千春而逢吉孺人曰何言之誕也抑
所樂固不在是於時四座停觴莫知所指予爲端竦執爵而起
曰古者王教修明內外順則女子無過執懿筐治絲綌采卷耳
議酒食形諸詠歌被之聲律王化於以章明壺範於以矜式後
世盛稱巴婦之丹穴豔述虞母之金章而閨闕之庸行罕史傳
之流芳匪特王化之不明抑亦後之人喜其異而忽其常也今
孺人足不履堂言不踰閭蘋蘩蕝藻之是脩織紵組紃之是謹
無表表之奇節無赫赫之勢榮爲燕喜而作頌將何辭以稱觥

而入其門雍雍然登其堂秩秩然少長以序籩豆罔愆與蘭風
昆季交者飲其慈易直諒之風而知其有母之賢也爲之歌小
宛之章釋斯干之旨以著其幽閒貞靜之美而王者之化亦無
踰於此矣孺人曰善吾聞頌無諛辭者君子也請錄諸屏以爲
我壺石之銘

林母蘇太安人七十壽序

蓋聞四照之花萬品植丹林而光蔚爲霞九衢之草十洲環翠
水而氣蒸成碧猶是丹臺之日月偏駐瑤京依然紫府之笙簫
恒娛金母果銜靈雛瓊筵之棗如瓜曲侑雲璈玉簫以花爲酒
當火樹星橋之夕正銀屏綵悅之辰綠萼敷英清臍冰霜之操
黃柑送煥春生竹柏之姿恭惟林母蘇太夫人武功右族夏伯
名家佩蒨禮嫻季蘭詩美五松衍彞歌少女之祥風八桂揚旌

降仙娥之寶彩麻姑指爪偏工織素閨中蘇蕙心思早燦流黃
機上洎乎鏘鸞賦就弋鴈歌成降穠李於連波配芳梅於君復
時林君策南陽之車騎法宛孔之雍容玉臂清輝頻年望遠布
帆明月竟歲忘歸太安人落葉添薪牽蘿補屋蕉紅十丈厨羹
勞洗手之調香紫雙煙熾管寄同心之語剖龍川之鯉頌獻椒
花擘剡水之牋譜成荔子抑且劬勞親疾支雞骨於三秋經紀
姑喪集烏傷於一境瞻少君之荆布人本宜家薦季女之蘋蘩
婦尤循職俄而劍飛單匣半銷牛宿之光琴悴孤桐獨冷繭絲
之韻然而膝前驥子早騰奇氣於蘭筋掌上龍文已露清神於
霍骨雖雙虹久化不無少子之尤憐而七葉相承共識是兒之
必貴柳仲郢篝燈丸膽亦勤午夜之思黃文彊扇枕怡顏足慰
丁年之志哲嗣研莊未逾弱冠久作壯游每顧客衣時懷母綫

慈暉草綠心隨海燕先歸春酒珠紅香與江梅並發萊庭戲綵
雛鳥增歡蘭譜拜牀鳴鶯起敬觀夫鸞龍綺歲集隼詞場將見
騰躍鴻遠日影瑤窗之麗扶搖羊角雲程銀漢之高竚紫詰
於三霄宣文婉美頌紅閨之五福樂府徵歌所以山川歷覽曹
大家遊此賦心童稚駢羅潘安仁述其養志杯擎七寶常酌綏
母之顏笄飾六珈未曜素娥之首金僊勤禮繡佛證盟推到翳
桑惠先戚屬憫茲撲棗愛及勾萌茲者值寶婺之降辰慶長庚
之不夜徧禳翠鳥傳來郤老之方激灩紫鴛釀出長生之醴問
表則花逾周甲七十爲稀計時則月在上辛三五而滿洵乎簪
添十屋爲今日之權輿潮湧八閩似方輿之福履也某與研莊
夙申蘭茝幸託葭莩慈愛溫良四德久欽於內則升恆承茂七
籤請籙於上元地隔銀瓶未附簪纓而洗爵書同雕管聊隨羔

鴈以稱觥惟願廣莫風清壽人曲進振秀飛華於魯冊佐觴宜紀實之篇介祺騰茂於周詩按節聆步虛之唱

記

蘊玉樓記

趙子梁丰度瑤林文章玉樹神清來衛玠之目語妙得君房之風兄弟孔懷無分第宅神仙在骨尤好樓居爰整閨房以安琴瑟與賢配宛仙夫人昕夕其中有順矣之歡有終焉之志夫人蘭質雕瓊茗華刻瑄吟追謝雪筆染班香藝不假夫師資德自成于天性貯金不可蘊玉斯宜偶得舊題遂顏新構以予與子梁有鷺求之誼雁序之盟於嘉慶元年七月七日召登此樓夫人避于別室命小婢春蕪給授筆札俾予記之按樓廣七楹兩楹居西之最不廓而敞非危自明繚以紅關間以綺疏繪棟霞

飛雕題景曜粉壁霜皜湘簾水澄陳設圖書彝鼎爲夫人唱酬之所素琴高張紋楸在局爐煙裊案牒花扣絃內則爲臥所窮而稍曲疏寮翳之但聞幽香襲人如蘭如棋蓋心可得而會目不可得而覩也子梁與夫人鰈比鵜駢喁喁酬和誓百年之好樂四序之新春之日則曉景弄妍芳風遠傳憑高極目思與花鮮夏之日則鳴鳥變哢綠陰染棟紉扇常懸銀床自癡秋之日則露白山靑當窗展屏一聲長笛遙天雀聽冬之日則檐靜雪滿幄深香煥餅有鮮枝硯無水管至于種蕉雨來洗桐月上陰晴異景晦明殊狀則斯樓之美棲息之樂偕老無違庸可旣乎夫重樓複閣連雲接霄龍獸撫柱虹蜺亘薄高則高矣高而易危廣廈細旃我佩子黻粉黛成幄笙歌繞叢華矣華矣華而易雕若夫鹿門偕隱未遂依親廡下賃春不聞將母茲則闕前埽

逕潔采白華樓上吹簫歡承黃髮比歸來堂上無雲散之悲較
松雪齋中有天倫之樂所謂慕古遺榮順時適志者其庶幾歟
韞櫝而藏有類賢人之隱守身如執允協女子之貞

天壇閣集卷五十二

天真閣集卷五十三

駢體文三

昭文 孫原湘 子瀟

傳

周春波家傳

君諱鳳池字春波家邑之蔡涇寧國府學訓導諱昂之長子也
生挺殊姿幼稟至性襁褓失恃卽異常兒法謹母疾號而卻乳
公著親喪踊如成人事繼母曹尤以孝聞丹奈抱樹飄風勿搖
霜鱗供餐積日不盡旣歿哀毀一如前喪連理之瑞自下於庭
階友于之聲罔閒於宗黨司訓公以懷田納祿卻軌蠲疴授勤
矚於庭趨委良裘於家督君鈎稽蠹冊料簡鱗塏勤以克家惠
能逮衆貸監河之粟而稼穫如雲寬仲郢之逋而農輸若水司
訓公晚年疾益甚君孝養益謹問其所好則四海之鮮具時其

輕煩則八蠶之縣進寶抗侍疾束衣帶者十旬韋溫嘗藥絕勺
飲者七日周氏鐵鑪族大釵鏤姓繁司訓公營幕郡城范氏義
莊之舉欲析東眷之產以均南戚之貧穀謀未成桑輪遽昃易
簣之夕遺訓載申君矢志述紹盟心應諾事歷六稔功成一簣
蓋其敬承之志有倍難者已夫有嘉賓之豐積乃克成卻惜之
仁有李勣之雄饒而後彰父蓋之德君家非好時產薄肥鄉一
困之指易空千斛之施曷繼此難之一也踰窗得免因小忿失
歡掩戶自撾以分財致懟君上奉寡嫂下撫弱弟或全琮散粟
分義穀於隱人而高陵訟田爽家肥於天顯此難之二也乃仁
能化睦義不卹私割美業於一成均餘田於九族弟友而順同
乎許武之家嫂助之施勝彼駱統之姊置義田一千一十五畝
義冢六畝計值一萬五千餘緡規畫盡善以司訓公名上諸當

事事 聞子旌施而不德司城無假貸之書善則歸親鄭展託
子罕之命敬宗收族之義繼志述事之行君無愧焉兩娶於顧
生一子嗣兄後繼室又卒有慕王駿之書常嘉華元之善雖志
存似續不無方朔之旁妻而恩重德宮未違管寧之夙約淵脩
旣茂高才益醇循例入貲爲縣令卜式助邊未甘雌伏毛義赴
辟將烹小鮮乃單父之琴未鳴尙書之鳥遽化嘉慶庚午八月
無疾而逝春秋三十有七昔思邈委化顏如生時遠知仙歸狀
若酣寢乃知仁不必壽而壽在人心仙不可求而仙在君骨斯
可異已君之從弟彬執業於子時時邀子泛舟涇上以此心知
熟聞操行謹徵行狀著諸簡端述好施於仁里聊以風夫鄉人
傳獨行於汝南將有待乎來者

國子監生黃君妻屈孺人傳

黃少莪上舍抱騎省之戚守公著之義六稔不娶孤居灑如輯其妻屈孺人事狀索余撰次會悲引泣情生於文故知合歡之木獨榮不競舞鏡之鳥孤鳴益哀非管彤高秀基鎬貞賢其何以感動德宮思深廬杖也哉謹按孺人屈姓懷生名石蘭其字也方在母懷卽失所怙甄癯則片月方墮曙浚則一星始輝宜以愛憐損其婉淑乃孺人則覩雁傷單瞻烏思孝撒其瓊瑱學男子之裝繡出斑衣作嬰兒之舞母言遘疾金滕一卷身叩圓靈玉版十行手抄方術棘心之善由夙根焉旣館甥於室慈顏得侍威姑異宮去則寡鵠誰依住則特豚虧奉孺人身心兩繫子婦兼修僅承蘭藉之肴筒獻椒花之頌著代未顯婦順已彰窮窈之稱兩家翁如也每值燈窗漏暝鏡檻珠涼髻溼蘭烟釵橫梨月孺人燕沉水之炷張落霞之琴綠茗潑而笑來碧觴抽

而歌起盤周四角無非慧業之辭管關雙聲盡是同心之調宜
乎分涼熨體得荀粲之深憐愛玩終身使高柔之心折抑其明
識尤越恒流嘗執蘭一枝顧而歎曰葵謝靡常使人惋惜如花
不落與草同腐耳味其元譚了了慧悟超超視恒幹如浮漚等
修期於一瞬故應來從月闕去逐風輪雲不依根花空賸蒂生
一女曰畱珠以產疾卒年二十有五翻身謝世便登叔姓之邱
撒手生天定在摩耶之座臨歿執郛君手曰婦職不終母德未
報願爲我補之烏犀紫玉成烟猶唱姑恩之曲韋眞仙舉終依
母氏之宮撫嬰涕泗蒙被訣語生死之際何分明也少莪開鏤
金之故箱檢蠶鑑之舊蹟旣寓哀於畫手復求永於文心僕與
屈氏故世交中郛家裏早識文姬濟尼座中時聞謝女芳華誄
素深慙希逸之才端操昭彤徐侯蔚宗之冊濡鬢吮墨次之云

爾

壙志銘

邵氏外女孫端琇壙志銘

端琇邵氏吾壻淵懿首女也生在十旬卽能言笑察人識物口齒自清授色知心睂目如畫旣卽免乳慶若成人屏騎戲而弗觀對肉汁而忘味孤桐初把琴德在心淑蘭始胎芳靄其性是以靈通百節慧悅重親其得曾王母大父母歡也挽衣必笑撰杖則莊怡色辟於弄雛嬌語勝於連鎖雪衾蘊火傾身讓溫圓果摘鮮奉手爲壽至於朗心聰警柔質溫文傷翊無辭絕絃能辨蟬絲學繡便擬鍼神彤管習書先排字母剪寒月之綵枯樹生春歌離亭之雲雛齡能賦方諸記載何以喻茲胡天降凶俾爾嬰孺寢沉疴者七日痛永逝於百年以嘉慶二十載五月初

乙酉日殤甫七歲前死數月嘗語人自憂不祿韋真示疾豫識
化期妙女寢天早知仙去非緣夙世詎解前因至是自周親
下逮臧獲涕不輟目哀無廢心其淑慧可知已予每過壻家端
琬依依侍立敬問起居明珠耀懷亦爲宅相和璧在抱比之道
生而今已矣能勿悲哉死之日瘞於北郭報慈橋邵氏祠堂之
側叢殤冢也爲之銘曰

嗟我端琬性姿淑美膚理凝雪瞳神翦水颯彼風輪彫茲玉藥
娟好秀慧未秋先零蒙俱驚盤長世康寧祥殃顛倒孰叩圓靈
中春初旬寢汝來側簪花滿頭有慘其色二角祲徵九旬應曆
北岡黝土永閔茗芬白楊翳天碧草如雲淒淒霜雨尋汝孤墳
調元瘞銘

嗚呼此吾邵氏第二外孫調元殤塚誕於嘉慶二十四年十一

月二十一日歿於二十五年十月初七日秀傾衆愛慧解親憂
未周一歲遽爾千秋銘茲瘞玉俾後之人憐此童烏而永保荒
邱也孫原湘誌

誄

延陵娘君席孺人誄

歲在彊圉斗維指酉吳君溫如以其配席孺人之喪來赴於余
恒幹不居濛陰易逝繩牀不輟王給事之心摧總帳空懸潘黃
門之淚滴此固芝房蕤秀霧遏邊簫蕙路香沉風鏘楚挽者矣
孺人系出安定予妻之仲女弟也蟬孀門第冠冕中吳嫺靜儀
容稟承內則弄藥爭花之歲能讓梨拳施衿結帨之餘兼徵栗
典迨乎總髮歸於延陵慘慘筐筥用芻蕘繁肅肅桂檣彌工纂
組羊燈佐讀樊通德擁髻宵中鴻案修儀孟德曜齊眉廡下吳

君維摩善病支父膺憂宛轉牀婆沉綿椅妾孺人身親樂曰手
錄蘭臺索瓊茅以筵簞虔呼季主緘金滕而禳禱誠叩圓靈威
姑憫其神臞宗黨聞而嘉歎至於姜泉崔乳思媚承先鄭絡秦
簞殫劬燾後婦德婦功允垂家乘已以母張太孺人齒逾八麥
道阻雙湖縑素頻通甘鮮時進去年太孺人沒喪葬盡禮蓼莪
嘔涕巾幘有王哀之風風木銜哀閨閣抱梟魚之痛猶欲龍松
植墓徧棲傷口之烏馬鬣培封好代銜泥之燕人之云亡嗟無
及矣吳君嘗欲倣范氏義莊捐西疇之產卹北阮之貧孺人臨
歿諄諄以此事爲念願以女紅所出置田若干畝助成善舉餘
資分杼柚之間原多衣被義澤佐藁砧而布能劑盈虛行見煙
騰芳甸待舉火者千家慶溢清門縣本支於百世此尤花姑感
泣共式徽音若玉騰華可鐫懿德者也善氣方凝厲氛遽集胡

香已滅憾西域之使稀靈草無根悵瓊田之路隔銀蠶永送金
棗長含嗚呼哀哉吳君悲深長簞痛甚絕絃乞舊史簪毫爲女
宗載筆余與吳君旣爲僚葺孺人之子又余女夫婚媾再申僚
嫩習聽仰徂音於珩珮敬撰德於旒旗其辭曰

瑤嬋毓秀瑄朗含章光啓昭憲誕鍾姬姜玉度曜潔蘭儀韞芳
象應圖畫節諸瑀璜友棠無間樹護勿忘曰嬪延陵簫鶴並護
如藹方春若風在扇織雲爲裳調瓊作膳賓澡承禋俎設奠
戚里咸稱尊煒交抃撫育嬰婉丸熊饋雪婚嫁屢經教養有別
玆璧觀主儲蘭秉芴爾館春秋麟胙作輟勾稽裕如纖微洞徹
女子有行實遠母氏帶水滌洞瞻望曷已迨飾其終蹕蹕不止
夜臺火青泉扇苔紫今可相從升靈尺咫嗚呼哀哉在昔范氏
首創義田倣而行之其澤溥焉爰贊夫子以希古賢鴻溝待畫

崔杼將捐永懷內助心傷九泉嗚呼哀哉欲手驅夫二豎兮苦
百藥之難攻恨六祈之輟滲兮歎八頌之違融盼雲霓而結想
兮羌桂旗之在空何遐齡之不假兮遺塵世之匆匆梁鴻爲之
雪涕兮薛鳳因而淚窮嗚呼哀哉風桂兮齊飄秋草兮同悴雲
衣兮黯華月儀兮掩媚撫蕭晨兮肅殺悲舜華兮旣墜幸瓊範
兮可垂將貞珉兮刻翠念通親兮維余爰執簡而泣淚嗚呼哀
哉問藥無對蒸丹不成香填柏槲路閉松城傳續中壘神遊太
清明徽如月永永光晶嗚呼哀哉

祭文

祭鮑銘山文學文

嗚呼星隕吹臺風淒索水子敬琴亡文康壁毀嗚呼哀哉永惟
右族本富聞人排龍掩陸突崔摧荀原鶴振采沼雁調馴季尤

挺秀品實軼倫綺歲欽寄清標傲儼月儀詞成風氣日上白馬
繼聲野鷺嗣響譽邀張延音恆鍾賞甫逾弱冠得舉茂才超躍
屈宋茹吐鄒枚奏鸚鵡賦登鳳皇臺寶光摩漢劍氣徹魁文憎
命達才替身災驚馬逸足鯨魚暴腮鬱鬱久居忽忽不樂王粲
離家陸機入洛油碧迎幢蓮紅啓幕地勝辰良賓酬主酢偶思
二別遂浮三湘胸吞雲竊名題岳易明月赤壁春風武昌哀猿
忽嘯幽蘭自香招屈剪紙奠賈命觴登臨懷古涕泗霑裳夜譚
華峯朝理輕策玉女在前明星可摘詩變秦聲碑摩漢跡越鳥
嚙伊羲娥倚撫循彼孟門至於積石歲屆重光月丁中呂烏鼠
山高狷鵲烽舉鸞起跳梁界難畫斧孤城如丸百雉集弩過鳥
不飛遊魚在蒲賓僚散星僕從淚雨廼擊蠻榼廼陟麗譙西眺
賀蘭北望隗囂黃河洶洶黑風蕭蕭生人玉門死葬寒潮舉琰

更酌何覓可招勁氣沮敵歌聲應刁軍門仗策戎幕進薨竟從
譚笑獲解氛妖西羌旣平南冠久滯忽懷舊遊兼仰夙契言秣
其車遄臻于衛陳榻握謀桓帷遮說愈風思神賦雪聲脆士慕
瓣香令投束幣學廬開榛皋比擁龜文藻式林詞瀾漑藝洛水
津縣伊川脈繼鄉書雪至客淚風揮荆枝葵秀棣萼潛輝春草
斷想秋鴻失依牀驚蟻鬪帳入鵬飛殷楹癡慨曾簣涕歔臨終
自悼飲恨無歸嗚呼哀哉鸞寶冰清鳳姿玉耀價本十城貢應
九廟終息溟鯤甘藏霧豹覓滯天涯名沈鄉校難問者命可延
者年貧能結客俠肯招賢委練難贖市絳交全緘孟化羽翮卷
成煙壽應躋嶽福自種田藥難駐老癯遽遊仙君未壯年痛遭
銜恤酌酒呼兄爲文祭姪憔悴行吟幽憂遭疾天實爲之斯人
早卒同鄉締戚異姓稱兄盧劉婣誼孔李交情荆門解榻梁苑

攀旌芝蘭蚤挹葵藿頻傾恩分逾極哀思交并尙約他年或從
息駕琴席歌筵藥欄花樹並暢春襟俱陶秋暇短景旣頽休辰
不借鬱結深衷淹淪大化銷峯峩峩琴水湯湯竟今可知先歸
故鄉謝蘭齊苗燕桂皆香臧孫有後魏萬必昌竚承

鳳詔爭入鵷行弓裘願慰圭衮計長執紼悵阻生芻寄將馬蹏
蹤跡鴻爪行藏困茲騏驥致此鸞皇蓉花泣露薤葉晞霜靈旂
颯降羽幬紛翔盤桓桂室卒奠椒觴

祭張子和觀察文

嗚呼番島之舶浮如豆方資鄭曉之謀舟山之星隕如盤遽報
朱紉之死守陴盡哭思次生哀而况風緊蘿陰雲連梓阪步兵
逝水江東之魚菜非春莊武摧柯上谷之鸞花減色颺輪電轂
能免巨卿死友之號鳳翮龍膺可勝子敬亡琴之痛維我子和

羈貫夙成岐嶷幼挺黃子炎七齡對日馬容卿六歲酬賓隨宦
臨邛綵筆絢相如之肆歸帆吳下瑤輪探蕭統之臺固已文章
無雙神采第一駒齒未落蘭筋已成爾乃器貴於屢礪才老於
歷試充觀國賓者八獻大禮賦者三日色眼迷人爭爲方叔謝
過宮花樣改世盡惜玉川東歸而君金鍊彌堅璞焚益瑩每於
雪照三白螢流一青囊颯颯而飛晨哦伊伊而課文博聞幽討
學如雞蹠之貪孤詣冥搜射必蝨心之貫泊乎春回黍谷翅擘
蓬山步東觀之花磚聽西清之鈴索蓋君已年逾四十矣凌雲
一賦

天子幸其同時畫日數行朝列歎爲巨手著粲花之論經疑悉
訪乎載憑抽摘葉之詞制草咸咨乎陶穀專集未出雞林之行
賈傳鈔短歌甫成鸞闈之嬋媛爭繡此君之名也已而官除郎

位綱奉仙曹握椒墀之蘭襖粉省之被柱題鳳字繼京兆之光
輝省伏雞香識馮郅之奏對戴星而出朝衣常拂平巖霜休沐
以還客座不言夫溫樹此君之勤也且夫金正持衡秋官執憲
深則礙恕縱則生姦道兼乎四難察窮于五聽君則法星在手
鈞石從心唐律二千條參定大中之典漢家三尺法蠲除廷尉
之苛黃沙靜職允矣爽鳩黑土生春猗歟獬廌白雲司署遇峻
法以必爭紅燭官書恨求生而不得此君之仁也一持玉尺衡
多士於章江再給銀符決平反於畿甸夫九邊軺傳恒誣馬援
之珠八月輜軒或謗胡威之絹君則提衡允望砥節首公竿牘
不行苞苴無謁畊柱遊楚餽金必辭正禮在梁饌錢爲怒是以
陸賈南役未有千金之裝賈禹西征反損百畝之產此君之清
也若夫十載綱曹三間板屋駕無駿馬門止緝奴都下黻冕所

興豪奢相尙大酒肥魚之社西音東舞之場獨能清淨自娛塵
喧不染止水一石爲右座之矧落葉半床入小園之賦鄭都官
雲臺閣筆并戒吟詩袁聿脩畫省焚香先辭送酒於是薦剡交
推爲第一清郎上契夫

九重雞廉稱職先書

北關之屏風豸服分藩遂簡南溟之保障君得不表色韻益驚
心尺書下天單騎就道時屯雲島嶼識妖祲之未消橫海樓船
報將星之先墜君封輅甫下巨艦先脩旣悼國殤兼籌邦賦未
免武侯抱疾兼程犯霜伍員搔頭一夕戴雪遂沈縣於美疾致
嬰戚於中年繡衣甫照於翁洲丹旄已臨於剡曲蓋蒞事甫匝
月爾烏虜哀哉軍中一韓纔破橫山之膽長城萬里未收道濟
之功浙民惜繪像之無從痛福星之易失悲殷雪竇淚灑梨花

某誼切末草心驚噩寢齋南州之芻束迓元伯之輜車傷崔寔
慈親誰慰據牀之哭幸蘇瓌有子能傳肯搆之書悲化芝焚裂
素牋而增愴椒馨桂醝盼翠葆之來歆他年

國史館中定爲易休作傳此日天童山畔先看羊祜立祠

祭瞿生寢香文

烏虜青琴摔地素月流天東阿之芳榭塵凝子敬之靈牀葉滿
祠堂種柏膏煎召白叟之嗟陋巷遺書壁毀下黃門之涕而况
子文尊酒尤賞彭宣元則門牆最憐雕武抱奇才而廢棄司馬
無辜膺美疾而沈緜伯牛有疾其能無淒迷永逝怛悵先零輟
春銜寢次之哀投簪效中庭之哭乎君生而秀慧長益清純演
志書楹削迹家術剋樹汁而爲墨筆冢增隆隨松陰以讀書板
牀減銳剛日柔日耽枕昨於學林今人古人樂居稽於文圃一

篇賦出爭懷安石之金五字吟成競賞邱遲之鵠遂乃抽囊橫
字拔幟圓池孔休源州辟茂才後生第一杜正元官試左畧才
辨無雙固自謂河海千言倉卒而題鵬鴟風雲萬里扶搖而化
鯤鵬者矣賈生年少陸子才多小挫鄉書薄游京邑郭有道一
身作僕灑埽躬親蘇季子百里負書關河足蒯秋霜灑背遽罹
支父之憂暑雨霑衣未免崔家之瘦謝客於車雷聲裏杜門於
人海塵中值槐市談經之日范式猶眠臨棘門校藝之秋子由
獨病都下冠裳所集蘭鮑難分競窺陸賈之裝欲飽劉調之壑
君獨避黃鸝之請守枯蠹之編赤日三竿黑甜一枕於是排闥
而入來仰視之寒鴟媒孽而成發潛機之水弩因才召怨以善
受誣謗書曉投飛禍夕至南冠鹿癯淒涼蘇子之詩西陸蟬聲
惻愴駱丞之句幸鳴鴉之挽索得飛鳥之開籠授筆札於白雲

之司撥烟霧於青天之上八义立就五木旋除絕勝鄒易之一
書不假絳侯之片牘此固

聖朝寬大優容生萬物之春亦緣姜里文章宛轉動五聲之聽
也金雞甫下黃鵠遂飛慶刀環之更生喜湖山之再覩自此青
鞵布襪爲不求聞達之人紅粉香籤作自放頽唐之計鶯花一
世風月三生題詩滿蕩婦樓頭脫帽臥酒家胡側蕭思話戲纏
腰鼓豈恤人言謝征西好佩香囊奚傷禮法蓋玩世本佯狂之
志而辱身實求死之心自傷蠶室之餘勲名流水并笑菟裘之
拙家計浮雲絃管千場係子畏放歸之日琵琶雙髻乃用脩按
竄之年後之知人論世者亦可以憫厥行藏哀其遭際也已猶
復枯桐半死日弄清吟修竹一庭時延佳士每當蘭韶菊秀鴈
候鶯初相與松柏悅心弦韋合贊彈王琴而寫韻擊銅鉢以催

賤譜秋聲於西子湖頭刻春翠於靈威洞府梅屋竹屋前喁後
于葵窗草窗此唱彼和亦謂嚼花吹葉猶不廢我嘯歌失槿收
榆夫豈禁人著述將以補其往過樂此餘生何圖長吉嘔心相
如消渴瑤輪晚仄璫樹秋摧豈芙蓉玉城遽迎主者抑水仙王
廟專候詞人大江東去誰彈天上之銅琶殘月西傾竟歇人閒
之檀板遺命以道士服斂銘書曰吹月填詞館太瘦生烏虀化
形之雀猶舞羽衣將死之禽尙歌布袴可哀也已某自慙擁絳
鳳謝成藍智喜戴崇遊偕禽夏痛雀言之得禍其罪原非憤蠅
玷之爭讒此才可惜臨風欲慟立雪何人用製哀詞以嘉幽處
焚香在鼎難酬師道之瓣香奠酒於尊聊答侯芭之載酒

祭黃州府通判李君真巖文

嗚呼星隕黃筓山摧赤鼻方城落蔭道雙馬於人間沔水訖言

把一麾於天上風淒大別白驥悲鳴雲黯臨臬蒼黎輟相霜蒿
露薤悼神理之茫然沅芷澧蘭折芳馨兮嗟若想移舟而莫極
路隔官湖願執紼而身遙塗由帝渚斯則論金契在慟一諾之
無聞照玉顏凋罄千言而莫輓者也維君列宿廻文德精降祉
慧由天悟岐嶷表羈貫之年秀澈風神通敏羨鳩車之歲對奇
鸚鵡不數家禽頂異麒麟何誇宅相門高通德璵璠徵紅氍之
騰座滿賜書騏驥卜蘭筋之舊時尊公綱齋先生望重西清各
宣中禁羹調玉糝拖紫紉以隨班炬撒金蓮飛翠綬而歸院坐
童烏於膝上卽預元經課雛鳳於燈前便通懸解孝綽方十四
歲語傾其座人開明誦二千言世目爲國士豐臺花發詩仙鬼
兮同參窈窕雲高酒聖賢兮命酌固已擅妙譽於日畿蜚英聲
於雲路已泊平分挾滄沱專漸句注翩翩能御人欽堂構之光

咄咄逼人天與河山之助關開鴈嶺落塞上之風雲綫急龍門
隱地中之鼓角浣紙於居延之水古色一囊揮毫於回樂之峯
秋聲萬里彈來碁局白登紫塞之圍寫入丹青馬邑龍堆之勝
拓心胸於萬古了才藝於千人宜乎入幕之賓卽屬趨庭之子
榜開金鹵隨檠戟以頻移地漉霜沙執鞭鉞而近駐譬之僚佐
襄厥賢勞綽有父風關乎慧業者矣及夫開府滄溟移旌渤海
心依橘蔭攀去轍於炎洲念切諫柎奉歸舡於琴潑輝煌舊壘
闢蔬圃以調蘭蕭散閒居御版輿而行藥鑒精誠於子懋瓶呈
蓮藥之祥感祈禱於叡明函啓芝泥之瑞侍疾則溫床扇枕蟻
蝨生衣承歡則置酒絃琴虎雌舞綵遂乃遙承庭訓誕發千函
近藏楹書博通羣籍掉鞅文囿勵旃辭林瓜當鄭灼之心板減
佛奴之坐淬鋒武庫縱橫五兵洗筆天河璀璨十色方謂鵬搏

直上目無制舉之科何期鸞薦頻膺身負太常之屈斯則羅隱
何須一第劉蕡自足千秋者已旋且悵噩癡之宵徵痛訃音之
旦至望澎湖而雪泣奔球嶼以星號神駕東還天退庾公之險
靈輶南返海填精衛之波負墳而一縣烏來廬墓而半天霍弔
猶幸起居八座差堪報答三春豈知庭掩枯梨繼以窗虛慈竹
心摧窆石未酬湏乳之恩力瘁菽宮永切蘋蒿之慕非其纏綿
至性惻愴天倫而能如是之五貝無虧三虞盡協者乎猶記運
丁易九歲之餘三伏雨闌風家浮宅泛登巢椽羸陸處舟居君
推贍族之仁恩普球時之良策計里書呻吟之數訪遍窮簷按
圖立賑恤之規惠均倅廩裏多益寡人皆載米之梁高察貳廉
空守盡開倉之郭默晉無滯積門門書魏絳之賢鄭有貧施戶
戶載子皮之德蓋雖斯人不出而其利已溥矣爰抒向日之誠

展籀雲之志策名吏部踐列端僚瞻知宏才自是南金之選飛
牋草檄不輸東觀之英餞安石於新亭相推劇郡辟子柔於京
兆妙簡名疆北癭南雲周景切題輿之勸三湘七澤士元圖展
驥之能於是綬章於君子泉邊繖笠於聖人湖畔從龍白梟挹
此秀靈演迤黃岡轄其衝要上綱任重王祥之四境不容別駕
名高趙軌之一清如水赭衣悉返仁風翔洽於元膺白望誰誇
德教從容於杜牧勵禹偁之風節標映州端軼任汲之溫文光
榮上府料其材諳劉穆之未足稱奇測彼神明陳仲舉焉能爲
役宜其堂開映雪軒啓畱鴻綠楊橋畔看得意之花翠竹樓頭
傾延齡之酒豈意晨曦運甓夕晷投籤呱呱弗視七旬重孝水
之悲慘慘多勞牛刺瘁忠葵之志三刀未益待留去後之思二
豎旋侵早卜治中之淚者哉僕憶加冠之歲君方總角之年嶽

嶽乃公觥觥吾友春明杯酒曾蒙王粲之知日下褰裾得結冬
郎之契及歸梓里益悅松盟閒暇輟相思類披衣於彭澤得錢
卽相覓擬痛飲於杜陵詩徑同探吾谷雲深之樹畫船共載尙
湖春煥之花此尤耿耿予懷軒軒在目者也及君畫熊南國分
虎西行攜琴宦於一官播弦歌於三戶輕苔遠損秋風沔日之
魚深樹遙思春日武昌之柳識馬周之顯貴聳必鳶肩懷宋璟
之端凝行如鷺步執意桑輪不借蓉露遠侵六品頭銜已了畢
生之遊宦四旬強仕便爲厭世之神仙攀滌木兮何從遲遲歷
紉望晴川兮曷極渺渺龍慌定知陳蹟尙多莫殫安仁之諫應
有楚薨未散爰爲宋玉之招惟君敦愷令問望些門崢嶸嶭
崇堂些紹惠胖競騁江湘些緹油曲翳鞍馬光些懇懇謹虔海
沂康些美冒衆流德澤章些忽焉旗宦下廻翔些超登九鴻極

孝芒些瑤席玉璫齎周觴些蕙肴蘭藉咀芳些麒麟山高連
鳳皇些麗乎歸徠無四方些尙饗

祭蘇小園明經文

嗚呼大赤天低隨藍颺緊高士峯摧何童星隕訐梁敲稷失丹
餌於商芝露薤霜蒿委榮華於朝菌論金契在搗馬策而聲撤
金鋪照玉顏凋對虎賁而悲深玉軫惟君幼而岐嶷長益清純
神朱霞以矯矯躬白璧以恂恂秋月詞高不受延年之玷春風
氣靄爭霑公瑾之醇方尊公園仲先生挈之晉豫也五齡就塾
九歲工書借紙札於藻井畫塵沙於綺疏換得羊羹綽有小坡
之號臨成狸骨早延雛鳳之譽已而捧杖遄歸下帷講授采珠
玉於休文挹英華於范岫賦奇鸚鵡杜郎冠童子之軍頂異麒
麟裴秀領後生之襲自是試居高等氣壓羣才祿入上庠之數

名升東序之槐孔休源策究天人無慙於標準崔慰祖學窮地
理競服其淹該固自謂鶯鶯文章摩聲霄漢鯤鵬變化應手風
雷者矣爾乃椿樹不靈蓼莪早廢共被肱寒同聲壘碎傷仲海
之遠行嗟家山之獨對遂絕意於希榮聊棲心於恬退於是南
軒時竹東沼疏泉西窗雨語北牖雲眠傾遺囊於金石標健藥
於圖編字重一鷺之紙文珍五鳳之輓揭嚼扁而摩挲於焉永
日展鴉叉而賞玩可以忘年夫晦奇不耀者必食報於期頤息
影自榮者必養和於淵默抑且惠以行仁施而不德付折券於
燼灰化銀盃於羽翼宜乎老聃玉局如魯殿之獨存子訓銅人
比商盤之是式今歲值君五十降辰嘉嫺擬五嶽圖屏良友取
百花釀酒詰嗣洗爵將謀孟疾之娛親賢兄賦詩亦爲卯君而
稱壽而君則堅辭賓客靜掩扃扉顧斜暉之景影示老衲之先

幾花塢紅沉難料重輪之東起蒲團漏盡先知隻履之西歸於
時一座皆驚六親咸詫比門際之逍遙怪鏡中之悲咤方謂文
翁語讖聊謝親朋庸知思曼風流遽捐館舍嗚呼哀哉憶我還
吳之日適君辭洛之秋登樓而逢王粲看竹而識子猷旣松盟
而柏悅亦蕙臭而蘭投吾谷秋丹時疊敏彪之騎尙湖春煥便
同李郭之舟交歷卅年歡同一昔命二子以來游開三徑以求
益問字載侯芭之酒佐以盤殮束修供博士之羊副之穀核臘
頭燕客社尾迎神必招邀以盡醉惟脫畧而彌真擬痛飲於杜
陵風隨步履類披衣于彭澤月洗陶巾時值秋杪曰惟小惡就
董奉以投林訪慶孫而入洛托雙魚以問訊猶未傳書盼一舸
之歸來方期勿藥迴帆乍卸病益甚夫懸蛇寢席未安門已臨
夫弔霍嗚呼哀哉君有懸河瀉水之才而命慳一第無伐性戕

生之行而壽止五旬天道寧論徒扣虹梯而寢寢善人有後惟
期麟角之振振爰采蘭肴爰陳桂醑冀羽葆之下翔願鳬尊之
載舉嗚呼賡靈均之楚些重爲宋玉之招製武仲之詠詞莫罄
安仁之語

祭邵蘭風少府文

維年月日翰林院庶吉士兼武英殿協修官孫原湘謹以清酒
一尊北望灑淚致奠於蘭風少府之靈嗚呼蘭風死矣去年之
春周生還里述君病狀勢殆不起急孳箋以寓君願扶疾以歸
休胡堅志於客死乃置書而勿酬檀姪北行載陳簡牘君執書
流涕而已不能卒讀蓋書到甫十日而君登鬼籙矣君之意氣
可籠罩乎萬類君之文章可僵走夫儕輩然而千金一擲十試
不第聊入貲以爲郎僅掛籍於右尉君之蹭蹬若此亦可以知

命而止矣猶復違衰親棄妻子九死無歸萬事都已竟如有知
能勿望故鄉而隕涕矣乎嘉慶壬戌之歲予上公車同行者有
子侃君亦聯鑣而並驅醢酒荆卿之里題詩憤王之墟登黃金
之故臺結燕市之屠沽當是時也豪情逸氣可以凌五嶽而跨
天都視功名於掌握薄金紫如土苴及庚午報罷而歸也君之
所弛亦已少衰矣然猶手斟北斗氣吐虹霓嘗偕吾弟澄之赴
蔡涇周氏主人出玉卮可容升許君立賦牡丹詩十首傾酒十
卮座客相視咸斂手以讓之而君之精力亦往往好勝而日疲
君詩文無所不工而尤工樂府予近年與諸子爲銷寒之局按
姜張之譜未嘗不把酒思君曰望北雲而延佇也而今已矣君
眞死矣其溘埃風而翔於寥廓耶抑爲白雲而棲於巖壑耶其
披髮而上訴天帝之旁耶抑蠱飲而酌天瓢之墟耶其逍遙今

舉杜若於芳洲耶抑悲吟兮鰭山鬼之啾啾耶其昏昏冥冥而
猶戀京洛之縉耶抑覓兮歸來而在尙湖之滄耶其操翰以唱
酬者爲子侃而舉琰相屬者其吾弟澄之耶疇昔之夜嘗獲見
君手執一卷屬定其文予攬其裾化爲烟雲嗚呼噫嘻是耶非
耶其賁志於生前者猶冀虛名於身後耶排闥闔以四望杳不
知其何所扣九地以招覓音寂寞而無覩攀淒淒之素幃尊有
酒其載醕願掀髯而來酌若生平之晤語嗚呼哀哉尙享

祭屈竹田通守文

嗚呼鱣溪水惡璧星招韓愈之覓鳳嶺雲寒鐵漢表元成之節
則有歌騷華裔遺雙鳥於金城酌水仙曹把一麾於瑤極風清
銅鼓白驥爲悲霜灑花田素馨如泣豈況塗由百越願執紼而
身遙路隔三瀧歎移舟而天遠元伯入巨卿之寢歎會如生彥

先好張翰之琴哀音莫罄惟君中台降祉列宿感精秀澈風神
慧由天授童烏失恃墓門回冬月之雷雛烏銜哀里社罷春風
之鼓愍孫孱弱遭太尉淑之云亡令伯零丁賴祖母劉之鞠養
驥足卜蘭筋之奮志渺青雲龍文決駒齒之騰頂稱甘露花林
鰓熟恒映月而橫經槐市名香每凌雲而作賦於是豫州側席
爭題仲舉之興徐郡辟書早達休徵之薦安石爲蒼生而起暫
舍東山子柔綰半刺而來聊依南斗固已吏民愛敬地誇珠海
之清詩酒從容壁記香山之勝爾乃三刀未益二豎偏侵思歸
下選之田乞解上綱之職秋風一櫛鱸魚菰菜之情夏屋雙扉
猿鳥藤蘿之興時繼配葉夫人道昇能畫泥新藥於漚波卿子
知詩鬪長箋於別業丹粉得佳兒之助四壁煙霞青琴來嬌女
之歌一門風雅每當繡纈花早鏡檻鶯初焚衙溼之香壁防釐

之紙調鉛殺粉商成盤鑑之圖關角鈎心製出宮詹之譜神來
得句則叔黨傳箋興到欲書則左芬展卷固自謂逍遙谷口子
真無仕矣之心愛玩家人高柔有終焉之志已抑且耳鳴好善
履道樂施石室丹成一市散韓康之藥山城雪凍千村被王望
之衣咸謂澤厚者福自流身修者家必吉豈意天違人欲樂往
悲來柿葉明時慘邁德宮之變桐花落處哀吟元九之辭卽君
以雞骨支牀姊妹並蛇懸致疾隋璣一碎旣痛抱夫西河楚蕙
雙凋更悲深夫金瓠從此蘭堂寂寞名花皆墮淚之容桂室淒
清璧月盡傷心之色由是山中司馬轉興雌伏之嗟物外屏星
頓作雄飛之想乃北游乎燕市遂東達乎羊城道擁金吾識寇
恂之復至兒騎竹馬喜郭伋之重來時程江以讎劇之區致國
土有滋豐之獄君以表臣之明敏兼仁壽之寬平奉檄星馳單

言雪釋水中兩日推冤癯於渡河市上一縑息爭端於遇雨斷
疑獄四百案棘林無夜哭之聲釋待罪數十家梧邱有雪冤之
頌遂貳潮陽之郡允推上佐之材開講院於黃岡仿學規於白
鹿王前廬後親爲月旦之評秋實春華坐鎮風塵之俗靖妖氛
於海甸赤白丸毋許交馳埽秋葉於鴻溝東西堡咸如安堵斷
繒爲炷茆簷悉誦其清風伐鼓窮歡珊網盡羅夫才士陸象先
之慈惠標映州端高士廉之神明光榮上府何圖星軺問夜不
勝鞅掌之勞露冕行春竟盡鞠躬之瘁維邑報土元之殞百贖
奚辭桐鄉聞朱邑之喪萬民俱慟其誼託葭莩悅同松柏雞豚
近局暇輒相思鷗鷺閒盟久而益密同舟入畫尙湖春煥之花
連襪尋詩吾谷雲深之樹猶憶攜琴北去載崔東遊日慘慘兮
西郊草萋萋兮南浦方謂河梁惜別雙鬢猶青彭澤歸來十年

非遠乃三橋楊柳卽人天判袂之期一曲驪駒是蒿里悲風之
唱望練江兮香綠剪紙空招盼丹旄兮迢遙歸棺何日折疏麻
以致奠聊同一束之芻泚斑管以抒詞竊附九章之些此日畱
衣亭畔無由素車白馬而迎他年遜步橋西敢忘斗酒隻雞之
誓尙享

祭季因甫州佐文

嗚呼長星壓腳神君無續命之絲天樂當頭仙骨有委牀之蛻
雖滌園作達譬巨室而偃歸人句曲譚元謂頑仙不如才鬼然
而蓮凋玉井百卉淒其芝燬銅池千林惋惜賫隻雞而赴弔客
不通名聞五穀而停春鄰皆隕涕豈况失中郎之玉貌難禁虎
士之悲撫武子之靈牀詎免驢鳴之慟惟君來從忉利降自毘
陀飲光感宿世之因摩詰示前身之寢是以生而瑰異幼卽靈

奇有任嘏不再問之風負禹玉志千里之氣年十七隨尊甫觀
察公之任臺灣趙犖兒弄便壘方營子產童牙能籌國政時值
盜連雞泊孽起狐邱驂路人搖鯨波鼎沸君隨觀察公勦捕斗
六門子明十五鄧當驚擊賊之雄張奮少年步隲訝攻城之壯
不旬日而巨魁咸服厥辜黑丸電掃人誇白馬之書生赤嵌風
清盜避朱暉之劒術蓋方其駒齒未落固已虎氣上騰矣設使
松杉合抱經大匠以程材鵬鶚垂天凌高秋而直上則士衡入
洛之歲早建功名仲華拜衮之年何憂青紫而乃異飈不順乾
蔭旋凋濬冲則雞骨支牀徐憲則鳩巢集戶宣秉卒官尤勝龔
公勵節子瞻渡海惟聞叔黨相從獨能含殮盡禮簿書中程慰
寡鵠之嗟切臯魚之慕安神翼利涉滄溟藉非忠信孚於水
伯純孝格於陽侯烏得疾如飛羽疑遠知仙術之奇穩若浮杯

獲幼安神光之祐乎窀穸旣畢旋遭許太夫人之喪服雖從降
恩重所生三載銜哀壯齡已屆同釋之之減產悲鄧禹之笑人
亦謂藉展驥足之長終著鳳毛之譽時哲兄眞岩通守分符江
夏佐郡齊安治譜方成脩齡俄促君爲撫左思之弱女痛伯道
之無兒往載其喪命長君成銑爲之嗣改字曰喬讓作武鄉之
後擇賢以植敬承祐甫之祧嫂氏邁疾處方維謹翠幃言傳復
甦道韞青衣膽奉爰感顏舍孝友之稱洵無愧已旣通仕籍仍
擁書城雅貫文林尤精韻府受桐君之秘錄得鮫室之禁方張
機思密預識落脣彥伯濟人爭趨列竈豈非合通儒之目參良
相之功者歟而且氣高湖海義薄雲天通九族之財火恒待舉
燭千石之枵粟不須償等陰德於耳鳴實善人所心折吾邑自
甲子至癸未頻遭旱澇時艱水毀歲異金穰比戶鴻磬連邨鼠

劫雖

楓宸綸綍疊開東郡官倉而桑土綢繆猶待慕容私廩惟君運
其慧舌而聚米成山化此苦心而布金滿地遂克十塲並開千
室以潛餽子皮之粟稻蟹休嗟披白傳之裘衣鵲羅結青秧甲
坼漸泯魚勞赤籍鉤稽弗爲蠹飽是惟數千斛之稻梁黃香能
給六百人之姓氏陸續皆知所由同儕服其精勤當塗資其經
畫者爾猗韓家之雛鳳衛溫氏之六龍小齋課讀移嘉樹以成
陰別室觀摩製銅槃而具饌謀詒燕翼韻協鸞音世欽孫實
其志氣非常我見崔瞻定爲後生第一信高門之建福維德量
所鍾祥卽或寶瑟絃僵綺牀簾冷香銷永歎葉落增歛亦可因
有後必昌解潘郎之悼爲善最樂錫何椽之符何意咎先庚日
竟徵飛鵬之占厄際酉年遽應見雞之兆同葛洪之睡化召思

邈而上昇蘭蕙闕芳芙蓉迎主嗚呼哀哉其苔岑結契車笠盟
心閔仲叔之延周黨轍輟樵蘇尹幼季之與班彪談忘昏旦霍
蓋團雲效陳遵而投轄蛟壺傾露儼文舉以開尊以君銜杯中
聖荷鋪佯狂箴景山之沉迷諷巨源之茗芋亦恒承夫嘉納詎
已中夫沉疴流連酒德何時飲公瑾醇醪奉揚仁風難耳想
恭儉黃鑪之痛斯深鄰笛之聲彌咽聊陳薤露式作椒觴想
像靈旂庶其歆格

天眞閣集卷五十四

駢體文四

昭文 孫原湘 子瀟

祭文

華母楊孺人祭文

春暉一寸夜臺百年孝養之期易窮嬰慕之心罔極舉魚茹痛
空號風木於九秋曾子銜哀惟絕水漿於七日死無以禮伸繇
發傷貧之嗟祭則徒豐永叔有薄養之歎罷社之感賢愚一情
瞻祀之吟古今同恨華母楊孺人聖善爲儀中脩備德承慈以
遜厚下曰仁因辛得甘占閑家之吉易枯爲苑著壽後之艱固
已惠問川流芳猷廳樹嫺黨服其神智閭里奉爲女宗顧仿子
政之冊書幽華累牘展蔚宗之敘傳高秀連篇與爲采厥虛聲
曷若徵諸實行昔在渾敦之歲邑有歷易之災市盡縣炊河多

沈瀛鴻流徧野鼠巢蔽空時長君雲友以好善之聲應當事之
請俾襄荒政以勸施麤仁流肺肝義顯睂睭炎風被體不辭襍
穢之行暑雨霑衣常在泥塗之徑呼庚與癸自夏徂秋予亦肩
隨行列目擊情狀歎賢勞之不易媿僕病之未能而雲友慙然
以爲命出慈闈事由老母問活人之數同於孺氏之考平反懼
陰德之鳴勝於趙姬之戒爲善然後知茅容孝行悉本於義方
崔實賢名都成於母德也已而節邁授衣命傳行粥孺人急開
倉廩分貸鄉鄰頓生九里之烟獨罄一舟之麥仁人有粟何勞
託鉢沿門老佛布金不待聚沙成塔於是一家向善萬戶從風
枯疇生薺麥之青闔邑有人烟之慶此非具聖賢學問菩薩心
腸而能若是之智水高流慈雲廣被也乎夫大德曰生祥降之
徵也仁者必壽祐應之理也以孺人之見義勇爲樂善不倦固

宜摩挲銅狄笑傲金仙開九袞以方長躋百齡而未艾而乃丹
蒸不驗藥對無徵霜華降而芳蕙枯飈信寒而慈竹折活萬人
之命偏靳以九疇去八十之期終虛其一歲鵲號徹夜聲停隔
巷之春烏鵲終天痛絕壞牆之踊某誼託通家情殷拜母景闡
儀而志切聞婺慙而心驚猶憶去歲歸來秋風蕭瑟孝忠母志
恨然掌之難醫全啓親衰愧剗脰之不急次君吟霞足音見過
問疾頻臨語及高堂知減餐之同病占來大耋冀勿藥之長延
相與悵悵秋暉躊躇冬愛撫萊衣而欲淚懼江鱸之空調何期
逝水終頽浮雲易變未及旣周之歲同爲無母之兒嗚呼將欲
勒端操於翠珉紀芳徽於彤管而麻衣伏處難爲竹冊之書塊
枕餘生不稱石渠之載仰義成之遺範警欬如聞悵公瑾之登
堂音容不再聊斟桂醕冀神御之來歆載仰蘭陔效左楹之致

奠

吳母王孺人祭文

結璘墮澥何童收八朗之芒始影沉淵阮樂掩四游之彩屈庭
之笙竹裂舌涇銀簫辟非之笈塵封淚罪珠琲猗猗翠失恨威
屑之無情攝攝紅彫痛隨藍之不待朱百年羽號卻被響直殷
於提婆王武子雪泣馮牀許自通於眞宰仰絳紗而企範高門
竊繫夫薦蘿瞻瓊島而揚徽薄奠敬陳夫藻蔭孺人通華胃望
淑慎閨儀古籍流連吉甫清風之頌長言婉婉女師德象之辭
精算術於五轡滅燭下盤中之子擅神鍼於十指幻形挑天上
之絲况復孝徵剗臂事取列塋號泣呼天至性過先雄之傳悲
哀捨地人言當嚙女之碑迨夫花盛李桃筭陳棗栗視弋雁之
明星聽鳴雞於朝日梁春有耦案橫偕隱之琴冀儲相莊野奏

聊以慰重泉之望有兒克承家學差可伸廿載之猶若夫履厚
彌清處膏若素吳鹽浙米握牙算以鉤稽鄭絡秦籌和書聲而
徹曉嫁女以禮竹笥木屐之裝選婿必佳玉樹瑤林之度至于
慈能逮賤惠以周親筠簋分貽六嫔河潤瑤筐饋問九里煙生
憫撲棗之鄰家踈籬不插慰翻羹之寵婢逢怒無咍是以龍媼
鴉鬟感慈雲而誦佛花姑竹母被廣蔭以稱賢然而境苑者遇
枯德豐者神悴掌珠忽碎痛荀女之先亡潤玉偏凋惜文姬之
早寡華井之蓮重跼不語心傷淇園之篠千萌非秋籜隕丹蒸
不驗番禺乏菖節之珍藥對無徵月氏失桑香之寶運丁易九
液雨零寒暑仄冬初春暉匿影某謀關中表心景柔嘉仰霜操
於巴臺方書銀管聞星沉於濟室空悵璇霄挺■蕪章竊附蔚
宗之敘傳表貞華德終慙子政之冊書

文學趙君妻屈孺人祭文

維嘉慶十五年歲在上章時維元月某官謹采芳蘭爲肴搗古桂爲醑以告於宛仙屈夫人之靈烏庠瑄朗收陰結璘掩彩西風夜哭白露晨零黃門永逝之文淚承簷霽希逸圖芳之誅挽遏邊簫世覆沖華古今均慨豈况夜珠明月亡玉尺之宗師滄海孤琴失埽眉之鍾子予獨何心能勿悲乎夫人玉耀爲姿珠淵秉性工傳三絕慧辨四聲華鋌都捐惟捧瑀璫之匣囊奩暫解全裝璫瑁之書旣歸趙君子梁觀諱齊吭完山儷影衿纓婉婉溫藻清嚴曲號姑恩髮佩南宮之訓書脩女誠管熏東觀之香築里之和若春壺闔之清如水葢采蘋弋鴈無以喻其婉孌矣霜裏幽蘭生原善病海中仙果根本離塵乃恒幹不依薜華遽萎珠旌雲導竟登女姪之邱虹節烟飛已在衙城之洞嫫嫫

雨泣嫗監星號某獨以爲逃穀林中抽身是福華鬢天上撒手
如歸夫造物忌才每靳文人之壽閨房好學尤非女子之祥夫
人彫刻七情牢籠萬態鏤雪團香之字嚼花吹葉之詞儻獲珠
笈與齡瓊籤授籙將使筆補天而媧駮毫脩月而娥驚宜死一
也左嬪無色鴻婦乏容慚彤管之三章虧曲臺之四德夫人明
姿迴出神質殊倫歌窈窕於周琴賦山河於衛翟朝霞翠羽望
若神人迴雪驚鴻儀空塵世宜死二也劉家阜茨阮氏緋桃擊
壁何嫌刻削尤甚夫人泉邱代聘曾刪卓女之吟帷幕兼徵最
喜洛神之賦引小屋而替月捧側荔以如花凝神則秋水爲激
噓氣則春雲布暝言容若彼德又若此宜死三也兼以奇資萼
發異穎颺飛繡不燭而鍼神璇無圖而絲絕偶臨衛帖便結蕉
菴閒發甄書能箋栗典背花枝而寫照寒壁生香揭蛺蝶以成

圖春屏欲活靈心九竅纖手一雙巧奪百家智殫六藝宜死四
也若夫俊辨流泉清言屑玉破連環而解闕施步障以攻圍媚
比秦嘉才輸旗鼓客如劉桢服到心形此尤智濬遙源早洗六
根之士心空慧鏡全開四照之花者矣宜死五也且夫庸行無
儀盛名非福德宮之芳易歇綠窗之稟僅遺爾乃塘上歌成家
稱博士合歡詠就女喚相如賓從西都問長信曾成之賦賈人
東海求惠班近著之書種德弗濃飲香太酷宜死六也蔡笏遭
亂班扇捐秋淑夢驚飛嫺幃寂颺每唱離鸞之曲難尋雙燕之
梁夫人則里號比肩樓名寫韻抽蕊書而賭茗排蕤簡以分箋
蛾黛含春秀供高柔之玩鴛鴦汎齊賢畱趙勝之賓素魄圓長
紅顏命爽宜死七也夫人有七死而其則有三感焉自愧撒鹽
久拚覆醬何圖孤唱忽被清臚妍製烏闌寫羅隱江東之集濃

熏雪帔繡道園春雨之詞巾幘叔牙香斂師曠可感者一堂護
髭衰山荆體弱夫人迎年遺佩饋歲承筐卹萊子之親獻榼枝
而作杖呼蘭英爲姊贈梔子以連詩可感者二公車屢困計吏
難偕悵須捷之不畱羞行滕之罔治夫人歌詩諷駕將伯辦裝
楊柳春風苦送將垂之翼櫻桃浴火重溫已死之灰可感者三
是用歎焚芝蕙撰德旗旒齎清淚於管彤報知音於裂素嗚呼
玉樓塵冷卽同帝女之臺瑤徑苔封便是麻姑之石屈庭疎影
竟撇文簫趙嘏音情空淒長邃然而蕊珠宮闕應忘蠶鑑之圖
阮樂天長別有靈妃之壽三生石碎九子鈴空夫人不且拔火
宅於千春視塵寰而一笑已乎某悲歌楚些非敢招瑤戶之覓
敬薦萎餘或可冀璇霄之格哀哉尙饗

邵嫺母顧太孺人祭文

嗚乎梵寶笏悲華鬘曇謝娥臯沉宵婺精韜夜蛻節誰招龍梭
遽化慈蔭全空佛幢猶掛騰悲襲姊馳弔夸娥鴉孃縋龍媼
滂沱暈添湘竹涇沍庭莎髻而致祭誄亦成歌猗太孺人慈祥
貞壽瑄朗降芬結璘誕秀東箭名門中吳貴胄玉度自啓蘭儀
天授柔徽旣茂孝德尤推頽雲未綰靈椿蚤摧幼能備禮弱不
勝哀慈帷婉婉織室徘徊旭日待賡慈暉欲斂藥對無徵丹蒸
失驗臂肉割霜血痕凝線輝駐秋明寒回春健永池乍泮玉鏡
旋催花迎齊贅月佇秦臺錦瑟畫響素琴晨開一鐙佐讀雙聲
共裁君舅召公一麾出守澤霽龍湫政崇鳳阜爰挽桓車往奉
越帚榛栗承顏蘋蘩試手爰贊威姑內政以齊閨闈整敕簿籍
鉤稽郇厨玉饌陶甕金釐咄嗟立辦胸沫咸宜柔之乍來衮師
尙幼撫是嬖婁褻之錦繡鴈鳩飼均消熊丸就蘆雪無裝竺雲

漏覆夫何賢守移節餘杭湖開明聖江渡錢塘賓僚輻湊冠蓋
相望實佐君子隨侍尊嫜中饋益繁靈心始瘁奉上惟恭逮下
以惠禮習柔嘉儀脩衿悅玉華遠曜蘭熏爭被淒淒丹旒蕭蕭
素帷桐鄉淚盡柳絮喪歸琴河春漲虞峯夕暉清門一掩涼陰
四圍井臼辛勤饕餮經紀西崦田租北堂甘旨銷段晨裁玫砧
夜起羊婦沉幾鴻妻燭理赤牒扇虐惟酉之年羣季居室蕩爲
雲煙藻井再刻芝楣重鐫費由公出心無怫焉葛翁之几壺公
之杖石氏屏風王家步障幼安黎牀中郎書帳悉以情推咸關
義讓秉坤之德吝嗇爲常懿太孺人任卹不遑施糜脫釧分貝
傾囊九里河潤七族風祥時值君姑兩膺危疾厠諭親浣衣帶
常結雀感幕飛獺銜冰出曲號姑憐孝由慈述素飈忽起黃鵠
遽單靡笄慘裂截髭沈瀾飛蓬爲妝苦藤當餐匪以高堂從君

玉棺旣稱未亡遂委家政蠶效愁絲鸞封淚鏡貝葉棲心優曇
皈命一串牟尼六時清磬貞筠旣矢慈蔭旋枯哀徹九泉禮備
三虞樂里雁序羣從鳬趨閨門禮範無改君姑還念武陵睠予
顧復丙舍匪遙庚泥誰築胥水之濱靈巖之麓淚泣愁紅酒澆
淒綠沙哥久逝阿買早亡三世宿草雙雛扶床加之撫卹訓以
溫良毋忘弓冶勿墜縹緗歲紀木榮年逢豕渡碧解籌添元冬
景駐花發金釐芝承寶露錦屏欲開霞觴將具慈顏轉戚莞爾
有云生辰張飲古昔無聞刀砧狼籍燔氏紛縕旣糜物力亦寡
仁恩當此苦寒窮簷凜凜玉樓粟生重繭龜坼蕭局誰貽桑輪
易置春易尙違冬心空迫節其冗費盡此婆心吳綿厚疊越布
細紵和生慈抱暝襲仁襟施惠必實種德於陰華髮延春蘭階
歲日奉杖鶯農扶輿蟾夕長樂百年臚歡一室羣仰母儀咸欽

嬪則正月始和春風忽勁步履偶顛膏肓遂病八頤屬和六祈
輟溱月馭旋歸颺輪難頓家失慈覆世喪女宗胡香塵滅靈草
雲封臬魚繼血薛鳳搥胸歌停里社相輟鄰春某於博陵實爲
中表智仰牙先禮欽鍾紹及與仲嗣同察孝廉欣瞻絳幔肅拜
形嶮賢孫蘭筋新嫵蘿施益稔裴悃習聞陶髮掩槽嚴明椎環
敏智服到形神傷茲殞逝敬拭彤管用綴蕪辭范書贊續劉冊
蹤希腓臚實俎醴醴陳匱靈其降格仰駐雲旗尙饗

跋

跋陸淳春秋微旨

淳字伯冲啖助之弟子

右陸給事春秋微旨三卷其鏤于開封者爲皇祐本南渡後久
已失傳袁清容得北宋舊槧其書復行于世顧袁本近亦鈔觀

余所得兩本皆舊抄本互有脫失因手自讐勘其所引三傳譌字漏文悉爲補正左氏本从刪節復經傳寫脫落至有文義不貫者竊以鄙意取原文增入間有漏引錯引之條亦用原文注釋于下至所引叔佐伯循之說有散見于

御纂春秋及胡傳者竝爲訂正其餘一仍原書惟案自序謂三傳並存其義當否以朱墨爲別四庫提要以爲汴本用嘉祐本草例別以陰易文後人艱于雙鉤於應用朱書者易以方匡界畫今

殿版仍其式簏笥簡陋旣無宋槧可校山城荒僻覓

殿版又不可得莫知的从已自來說春秋者除鄭學杜例外陸氏爲最古雖孫直講之峻法未免濫觴而胡文定之折衷頗爲藍本發明簡當不可謂非素王之功臣也

跋袁仁胡傳攷譌

仁字良貴號蕩波蘇州人著有尙書砭蔡編及此書
與季本同時相善

右袁蕩波胡傳考譌一卷計四十一條惟會防條與傳無涉自
元延祐二年頒胡氏之書於校官明永樂因之經生家罔敢齟
齬洪武間張以寧曾著胡傳辨疑其書久佚陸子餘出始冒言
駁正是書踵以論辨頗出新裁如謂齊桓揅邢不詭尊王之正
高子盟魯斷微兼國之私邾敖之卒禍始養癰髡頑之亡釁由
悖禮誅許止無君之心罪浮於嘗藥寬晉人應兵之獄咎歸于
殺師悉能引申大義發揮微旨至于周朔之不冠夏時議根志
道蔡侯之勿僭公禮論出伯恆歸田不必歸功于夾谷沿陸氏
之餘獲麟不必應瑞於尼山采新論之旨卽非心得不謬是非

雖吹毛洗垢間傷於刻深而握瑜匿瑕不掩其密栗竊以無多
寫帙嘗得一轡有功經傳助可比翼固非妄爲論甘忌辛是丹
非素者已惜無善刻精讐僅從延陵氏假得抄本就管見畧校
一過云

皇祐新樂圖記跋

右皇祐新樂圖記三寫宋阮屯田胡安定撰述進御之書也本
以李照樂下三律詔胡阮改造止下一律當時房庶力闢其說
以爲照以縱黍累尺管空徑二分容黍千七百三十固失之長
瑗以橫黍累尺管容黍一千二百而空徑三分四釐六豪又失
之短夫截竹解溪元音斯得實葭緹室中氣自應漢制累黍之
法特以較絜度量執黍求律本乖古義然而倫瑄房準樂府失
傳周輔漢尺法物滋僞今欲撤黍求度廢度審律辟之策杖索

涂扣槃捫燭已夫以竹作管而竹之巨細失均以黍定分分定而管之徑圍自得今按所造原本周官兼采漢制尺寸不詭乎度數形模悉洽乎禮圖惟大黍累尺小黍實籥未免矛盾而較之庶說欲以千二百黍亂實管中長短隨之縱橫莫辨者孰有當乎夫范蜀公以律生尺而太府樂尺實下舊樂三律矣魏漢津以指布度而大晟樂器工人不能成齊量矣故知師心愈巧準施彌失累黍之法猶爲近古雖亡勗咸之精微尙尋峴朴之墜緒未可執蕤鬋害金之論遽訾大安子穀之制也沈約云樂經亡于秦隋志樂經四卷蓋新莽時所立今亦不傳雖有寶常令言文收之徒簪作罕覲則是書實爲樂經之繼別矣從清河氏借得舊抄本載陳直齋吳壽民趙清常三跋因并錄之

跋孫之翰唐史論斷後

之翰名甫

右唐史論斷三卷宋孫諫議撰原其短遷紀之破體病胸書之
冗繁法取編年事綜實錄成書七十五卷得論九十二篇仿筆
削于麟經備是非之龜鑑誠足以發揮幽昧刪正繆悠惜平原
書久入于禁中副錄罕傳于天下惟茲論斷畧見風徽觀夫中
宗紀年守公在乾侯之例武氏實廢援夫人遜齊之文辨思道
之下請室譖豈河南坐睢易之陷孤城亡由次律寬文成之不
言事殊于穎考責臨淮之擅殺勢異于穰苴悉能斷取心裁見
空目論至于長慶失守病及先朝大中儉勤稱爲小節闢朋黨
肅賢奸之路重宰相繫安危之根彌足藥石君心苞桑世運比
于淳夫之鑑更切事情譬諸縉叔之書尤中窾要也按曝書亭
跋語是書一鑲於南劍再鑲于東易歲月旣深流傳益寡茲從

心葵吳君處借得抄本卷首有曝書亭珍藏印竹垞先生名印
又雪莊張氏鑿藏印卷尾敘寬山重校蓋其珍逾尺璧惜若兼
金自廬陵涑水脣山南豐諸公固已然已世傳有別本先列唐
記者較此倍之竊謂洛陽笥東坡未睹其全內府縹緗北狩
盡亡其籍當時已有烟雲之慨近代反獲金石之藏以秀水之
淹通何未之寓目也且拾羽得翠亦何取乎吉光采蚌獲珠可
竟遺夫海月寧從古本未敢求多爰與吳君重加讐勘著之于
錄并附諸賢所爲志狀序跋于後庶幾李花之盛衰十八葉指
數螺紋貞觀之政治二十年手分龜策用著千秋之金鑑微特
一家之寶言已

高似孫子畧跋

續古氏取鬻熊以下三十八家著之論說其卑法術拒刑名黜

元虛埽埤闔可謂卓然絕識矣惟能決洞靈之妄而樂治丹經
能戒黷武之殘而侈言陣法未免目淆五色見涉兩歧至謂殷
楹旣奠子思未生竟忘泰山未頽伯魚早卒偶疎檢點未足警
警要其頰首孟氏折衷孔經揚子有云好書而不要諸仲尼書
肆也好說而不要諸仲尼說鈴也高氏其免於此議歟宋斯久
廢茲從百川學海中錄出爲校正脫誤四百餘處復取漢隋唐
諸志及馬鄭兩家之書核其篇目悉爲釐正稍還匡廬之面目
云

跋龍筋鳳髓判後

唐張鷟撰字文成號浮休子深州陸梁人

右龍筋鳳髓判唐張文成所撰紫文入牕氣早著夫凌雲澹墨
書名第遂高平調露舉青錢而充選有萬簡萬中之能摘丹筆

以垂仁比五聽五聲之允宜其中科八舉而無雙選判四參而
皆最譽馳鹿塞價重雞林微特覓舉者戴若名經秉讞者珍爲
藍本已或者謂灋惟助治刑以教中辭貴明徵體尙簡要採林
華之豔不切霜威擣枝葉之繁何關電勑不知先王議事以制
君子明慎用刑折獄必據乎經文定讞直根乎史斷方朔重鹿
之風究近滑稽張湯磔鼠之文殊嫌兒戲寧成乳虎終少一卷
之書郅都蒼鷹徒知三尺之律是以兒寬奏上非俗吏之所爲
不疑平反惟經術之是用延英叩閣之諫置笏引經昭陵斧柏
之爭盜環述史但論適中乎平準卽言不病其敷腴固當與白
樂天之文集西轡並尊李元紘之判章南山同鎮况乎文選備
制作之奇獨無讞藁英華見搜羅之富不著撰人旣涉獵乎百
家寧偏枯于一體詞翔藻耀猶不失駢體之宗件繫條分兼可

補義疏之闕原書上下二卷劉敬虛益之以注離爲四卷雖勤採掇頗失冗煩茲本一仍驚書無取鵬輯云

跋趙氏欽器圖後

右欽器圖趙君鳳山宰晉江時得此器於曾工部家後以獻張蘭渚中丞而別命銀工仿製一器繪爲圖冊哲嗣玉汝出以見示者也溯自古皇尙象聿陳勸戒之卮宣聖述聞益昭宥坐之訓制傳闕血洛東猶奉典型劫闕桓靈征南始以意造厥後宇文二器曹邸五觚法物昭垂代有仿作洎乎宋室尤秉周模邇英御閣公雅首覩其規宣仁垂簾欽之獨蒙其賜流傳以迄孟嗣輾轉而入閩州趙君於琴案生春之餘發嘯堂集古之興天鳳銅料遂入韓家景山酒鎗得歸何黠物聚所好事非偶然夫立器生禮因象著型父癸母辛盤匱之歡苑爾叔彝伯卣籩豆

之樂翕如如書讒鼎桀丕顯之箴姬錄豆觴勒懽逃之戒考父
三命之鼎循牆益恭孔惺六月之銘纂服罔懈咸足以羽翼名
教砥礪綱常此則中正懸規滿盈示損方諸稷廟之象致謹於
涓涓譬彼商衰之文彌防夫嗛嗛是以居高思危無忘自遏茲
器維則常與善人矧復辨寸非所釋興爲兕兼足以繹夫夫之
惜審亞亞之殊匪徒民俗之令儀抑亦藝林之鴻寶已趙氏故
有文毅公兕觥世藏家廟旣得此器用以爲配黃流在中神保
是饗兩美必合子孫允臧雖冲之舊藏已入竟陵之座而君餘
別製猶符博古之圖玉汝撫先人之手澤表廉吏之清風重付
裝潢徧徵題詠岐易石鼓之作將有繼乎昌黎碧山銀槎之歌
是所望於秀水聊疏短引以導先聲糠粃在前主臣而已

跋張孝女傳冊後

嘗謂廢櫛徹琴孝子之本性嘗藥減膳侍疾之恒儀故銜哀絕粒賢者自知過情取急刳胙議者謂非中道金滕之書斷屬附會非聖人所作也孝女力殫湯液覓飛牀第因勞遣病積憂致亡乃其捨地之誠匪出瞻昊之命俗傷臆說比請代於三壇鄉里喧傳道通神於八柱不知直書憂疾彌見忘身托迹元虛轉誣至性宜急爲之論正固不憚于表微諸公所作存而不論云

書陳雲伯大令河東君墓碑後

自昔蒼梧高殉節之雲祠崇斑竹新息誓復讐之水廟祀桃花綠珠一井圓潔淳波紫玉孤墳貞香沁土匪獨標其勝蹟抑亦勵彼頽風河東君者當建封化鳥之年矢代國靡笄之志時則狐域含沙鼠牙肇覺鳴鴉入室離卵瀕危君念碧玉留身則承嗣之驥視不絕元英碎首則嚴武之悲憤方消於是帶掛貞枝

粉書聖壁夢夷族難解散仇謀雖使莒婦報夫荀女就義曷以
過焉或病其書校枇杷曾填樂籍歌迎楊柳本隸章臺生已舍
瑕死寧論節不思梁家桴鼓比洗氏之知兵毛惜蛾眉學貴兒
之罵賊白圭尙可磨也青樓豈無人歟黃鵠七載未聞夜半捐
生燕子十年終欠樓頭一死如君者可謂蓮花不染芝草無根
者已或病其投刺黃門催妝畫舫恥同帷幕事類桑中不思珠
貴投明禽須擇木紫衣虞候識李靖之英雄綠綺當壚爲相如
之佳耦但使節高晚蓋何容議刻泉邱彼廬江旣敗而入宮阿
紀不言而終嫁杜秋孌詩題金縷沈阿翹曲奏涼州視此爲何
如哉或又病其捐軀不早引決已遲與其殉夫身後看譙叟之
簽名何如誓死君前當朱游之和藥不思蕭傳將裁夫人入阻
疊山尙在李氏敢先君指劍瀝誠握繩諷義而蓮池水清庭芝

求死而不得梯雲火滅應獮墮地而猶生遂使沈約慙妓師之言張谷負新聲之諫至於朝雲說偈伴白髮之坡翁潤玉長齋授青園之梵行識者可以悲其遇已君葬所相傳在秋報門外拂水莊故址之側末裔式微叢冢摧敗嘉慶庚午之歲錢唐陳君文述來宰吾邑百廢具修爲政多暇乃偕同志海寧查君揆金匱華君兩植披荊榛裒益沙壘武擔攢鍾五丁表石鏡之門靜樂叢鄉一抔掬牆陰之土於是礪文石碣昭示來茲所以表義烈重風教也段橋芳草客澆蘇小之魂香逕紫蘭人設眞孃之奠信都道上寵奴可呼蘭昌宮前雲容斯在况才節如君者而聽其黃茅烟鎖青燐風飛金盃飄零玉鈎沈沒也耶湘忝隸茲鄉樂聞勝事竊慕青綾之義用題黃絹之碑庶幾絳雲遮處霜楓連齊女之墳紅豆生時春燕識玉京之墓

考

玉磬考

原夫制器尙象義有取乎磬折審音立辨度不乖乎中矩是故周官磬氏必嚴勾股之分商頌樂章特著依聲之律此磬之所以重於衆樂也粵自母勾有特縣之造位法西乾后夔循以詠之聲鳴應上帝涇水所產未適陰陽之中泗濱所浮終少清越之致是以特選天球以爲歌磬制則殊編而特殺音則和笙而間鏞蓋玉產西方至清兆人君之德磬爲主樂惟卹導民事之先登之清廟非諸侯所能僭縣之東序匪衆音所得先齊侯賂晉藉厚賄以止兵文仲如齊資重器而告糴雖或一時輯民之計已失先王制樂之心沿至後代漸亡其制漢武誇輕玉之聲隋文喜翟泉之獲蘇夔解律而造獻賀循脩簴以奏歌擬之古

音要非法物至於藍田綠玉之采鈿珠珍怪之飾製作愈精音聲愈敝有道之主庸有取乎夫宮縣十二鼓博三分有升降隆殺之等有親疎貴賤之別明堂宣響王道於以教成四野聞聲萬族因而情暢所以開皇垂庭徒招神人之怪華原代石卒致范陽之兵樂以饑人磬尤示德可不慎與用是博採前規折衷衆說揆之古義庶無戾焉作玉磬考